



# JORNAL

## do

# Parlamento Nacional

VI. LEGISLATURA

1.ª SESSÃO LEGISLATIVA (2023-2028)

## REUNIÃO PLENÁRIA DE 28 DE AGOSTO DE 2023

**Presidente:** Ex.<sup>ma</sup> Sr.<sup>a</sup> Maria Terezinha da Silva Viegas

**Vice-Presidentes:** Ex.<sup>mo</sup> Sr. Alexandrino Afonso Nunes

**Secretária:** Ex.<sup>ma</sup>

**Vice-Secretárias:** Ex.<sup>ma</sup> Sr.<sup>a</sup> Maria Teresa da Silva Gusmão

## SUMÁRIO

Sr.<sup>a</sup> Presidente declara aberta sessão plenária ne'e iha tuku 9 liu minuto 13 no halo leitura ba agenda serbisu loron ne'e nian.

### **Antes Ordem do Dia -**

Leitura Relatório kona-ba Fiscalização Comissão de Economia e Desenvolvimento (Comissão D) nian iha Município Covalima, Ainaro no Manufahi, husi Relator Comissão nian. Iha relatório ne'e comissão destaca problema

diferença iha interpretação entre *Timor Gap* ho *Timor Resource* ba acordo perfuração mina no gas iha Suai, nune'e, husu ba parte competente atu buka solução tanba iha implicação ba perfuração.

Tuirmai maka leitura Relatório kona-ba Fiscalização Comissão Saúde, Segurança Social e Igualdade de Género (Comissão F) nian iha instalação SAMES, I.P. nian. Problema principal hirak ne'ebé comissão ne'e identifica durante fiscalização maka hanesan empresa importador produto

farmácia nian balu la registado; rotulagem ai-moruk nian la tuir legislação ne'ebé vigora; SAMES halo aquisição ai-moruk sem autorização prévia husi DNFM; legislação ne'ebé precisa atualização; condição infraestrutura nian ne'ebé la apropriado no falta de recursos humanos.

Liu tiha ida-ne'e, Bancada KHUNTO, liuhusi ninia Chefe Bancada, halo declaração política ne'ebé toca ba Programa Merenda Escolar.

Iha intervenção oin-oin Sr. Deputado no Sr.<sup>a</sup> Deputada sira foti assunto sira hanesan: ferik katuas barak iha Manatuto ne'ebé seidauk simu pensão ferik katuas nian; SAMES, I.P. ne'ebé sosa ai-moruk la tuir organismo ema Timor nian; falta ai-moruk essencial sira iha posto saúde sira; transferência médico sira husi posto saúde sira mai HNGV; assiduidade comandante Bombeiros ida nian iha serbisu-fatin; transferência escola técnica agrícola sira husi Ministério da Agricultura nia competência bá fali Ministério da Educação nian; falta ai-moruk iha HNGV; sinal trânsito nian sira iha cidade Dili; mecanismo recrutamento estudante foun sira-nian iha UNTL ho IPB; falta atenção ba cidadão sira ne'ebé sofre moras mental; confronto ne'ebé sempre mosu iha tempo kalan entre membru sira husi grupo arte marcial no arte ritual sira; indicação corrupção iha reabilitação ba plantação café nian; destino professor contratado sira-nian; destino husi funcionário sira husi instituição pública hirak ne'ebé extinta ona; karau ne'ebé husik livre iha estrada direção Hera nian; falta sentina iha escola balu iha Dili laran; intervenção GMPTL nian iha problema ne'ebé Deputada balu hasoru; condição husi equipamento no fatin serbisu Direção Tuberculoso nian iha Laboratório Nacional; distância entre torre empresa telecomunicação nian balu iha fatin balu iha Díli laran; falta manutenção ba trator Estado nian iha Lautém; condição estrada iha Posto Administrativo Lautém; pagamento ne'ebé CLN seidauk halo ba camioneta balu ne'ebé centro ne'e aluga durante implementação programa Cesta Básica; lixo ne'ebé comunidade soe arbiru iha Díli laran; circulação desorganizada transporte público nian hanesan bus ho microlete; localização depósito *Pertamina* nian iha Praia dos Coqueiros; evolução husi ratificação ba Convenção kona-ba Ema Lakon; irrigação iha Vemasse; impacto husi férias judiciais iha Ministério Público ba serbisu PNLT nian; património ne'ebé estado indonésio husik hela; plano Chega! nian atu harii centro arquivo histórico; ofensa verbal ne'ebé Sr.<sup>a</sup> Deputada Olinda simu husi Deputado balu; perigo husi ai-

hun boot sira iha estrada direção Balide ho Hali-Laran nian; ligação ilegal iha canalização bee moos nian iha suco Lahane Oriental; agressão física ba labarik menoridade balu;

Tuirmai, Sr. Vice-Ministro dos Assuntos Parlamentares, Adérito Hugo de Jesus, hatán ba questão hirak ne'ebé Deputado sira levanta iha sessão plenária.

#### **Ordem do Dia -**

Eleição de três representantes para o Conselho Superior de Defesa e Segurança.

Sr. Deputado no Sr.<sup>a</sup> Deputada sira ne'ebé halo intervenção maka: Olinda Guterres no António Verdial de Sousa (KHUNTO); Gabriel Soares no Anacleto Freitas (CNRT); Antoninho Doutel Sarmento (FRETILIN); Mateus da Cruz de Carvalho (CNRT); Luís Roberto da Silva (KHUNTO); Marcos Soares Martins (CNRT); Maria Angelina Lopes Sarmento (PLP); Cedelízia Faria dos Santos (CNRT); Armando dos Santos Lopes (PD); Veneranda Lemos Martins (CNRT); David Dias Ximenes «Mandati» (FRETILIN); José Virgílio R. Ferreira no Natalino dos Santos Nascimento (CNRT); Sancha Margarida Tilman (PD); Dário Madeira no Joaquim dos Santos «Boraluli» (FRETILIN); Maria Gorumali Barreto, Ricardo Baptista no Domingos Augusto «Deker» (CNRT).

*Sr.<sup>a</sup> Presidente declara taka sessão plenária ne'e iha tuku 1 liu minuto 1 loraik.*

Sr.<sup>a</sup> **Presidente** (Maria Terezinha da Silva Viegas): — Ita hahú ita-nia sessão plenária ba loron ohin nian, ita atrasa tiha ona onze minutos.

Obrigada.

*Horas hatudu tuku 9 liu minuto 13.*

Bom dia ba distinto Deputado sira hotu, bom dia bá Sr. Vice-Ministro dos Assuntos Parlamentares no mós ba audiência ne'ebé marca presença iha sessão plenária dadeer ida-ne'e.

Ita iha ona quórum funcionamento, ho nune'e ita loke ita-nia sessão plenária ba dadeer ida-ne'e ho «Agenda n.º 17/VI/1.<sup>a</sup> – Reunião plenária de segunda-feira, 28 de agosto de 2023...» – temos a agenda atualizada.

«...09h00 Abertura

#### **Período de Antes da Ordem do Dia**

1. Apresentação e apreciação do Relatório da Fiscalização da Comissão de Economia e Desenvolvimento aos municípios de Covalima, Ainaro e Manufahi.

2. Apresentação e apreciação do Relatório da Fiscalização da Comissão da Saúde, Segurança Social e Igualdade de Género à Direção Nacional de Farmácias e Medicamentos.

3. Declaração política da Bancada Parlamentar do KHUNTO.

4. Intervenções diversas dos Srs. Deputados.

5. Intervenção do Sr. Vice-Ministro dos Assuntos Parlamentares sobre questões suscitadas pelos Srs. Deputados.

#### **Período da Ordem do Dia**

Eleição de três representantes para o Conselho Superior de Defesa e Segurança».

Ho nune'e, ha'u loke ita-nia sessão plenária dadeer ida-ne'e, ita tama kedas ba Agenda n.º 1, Apresentação e apreciação do Relatório da Fiscalização da Comissão de Economia e Desenvolvimento aos municípios de Covalima, Ainaro e Manufahi.

Ba Comissão D, se faz favor.

Sr.<sup>a</sup> **Olinda Guterres** (KHUNTO): — Bom dia ba Sr.<sup>a</sup> Presidente em exercício, Vice-Presidentes, colegas Deputados.

Ha'u hamriik, haree Comissão D ne'e ami na'in-rua ou na'in-tolu de'it mak iha-ne'e, Presidente mós seidauk mai, Vice mós seidauk mai, ne'ebe, ha'u hanoin, bele *tunda* fali ba aban. Bele ka lae, Sr.<sup>a</sup> Presidente?

Obrigada.

Sr.<sup>a</sup> **Presidente** (Maria Terezinha da Silva Viegas): — Obrigada, Sr.<sup>a</sup> Deputada.

Ha'u husu ba Plenária, karik concorda, ita bele agenda ba aban Relatório Comissão D nian.

Ho nune'e ita hakat ba agenda n.º 2, Apresentação do Relatório da Fiscalização hosi Comissão F.

Faz favor.

Atu hato'o ba distinto Deputado sira katak Comissão F nia Presidente seidauk to'o mai, temos aqui o nosso Vice-Presidente da Comissão, ao mesmo tempo Relator.

Se permite, ha'u fó tempo ba Sr. Vice-Presidente, como Relator, halo favor halo leitura.

Sr. **Relator Comissão F** (Luís Ximenes Caldeira): — Obrigado.

Uluknanain, agradece ba Maromak tanba ho nia graça no nia bênção ita bele mai fali iha Plenária ida-ne'e, iha Uma-Lulik, Parlamento Nacional.

Ho nune'e, ha'u atu lê relatório ida-ne'e, uluknanain, respeito ba Presidente Parlamento em exercício, respeito mós ba composição Mesa no respeito mós ba Vice-Ministro dos Assuntos Parlamentares no distinto e distinta Deputado sira hotu, bom dia, dadeer-saan kmanek, ba mídia tomak no povo doben Timor Lorosa'e.

Iha-ne'e ha'u representa Comissão F atu lê relatório husi ami-nia fiscalização iha Direção Nacional de Farmácias e Medicamentos iha Ministério da Saúde.

### «I. Introdução

Comissão da Saúde, Segurança Social e Igualdade de Género (Comissão F) hala'o visita fiscalização baseia ba artigo 92.º, artigo 99.º n.º 3) alínea e) no artigo 145.º n.º 3, husi Constituição da República Democrática de Timor-Leste, combinado ho disposto iha artigo 35.º alínea c), artigo 79.º alínea f) husi Regimento Parlamento Nacional.

Conforme iha Anexo I deliberação Parlamento Nacional n.º 3/2023, 3 de julho, hodi constitui Comissão Especializada Permanente no define área competência ba Comissão F, mak hanesan tuir mai ne'e:

- a) Saúde
- b) Segurança Social.
- c) Labarik.
- d) Terceira idade.
- e) Cidadão portador de deficiência.
- f) Combatentes ba luta da libertação nacional.

- g) Igualdade de género.
- h) Inclusão no la discriminação.

Iha lora 2 fulan-agosto tinan 2023, Comissão realiza atividade fiscalização iha Direção Nacional de Farmácias e Medicamentos. Atividade ida-ne'e ho objetivo atu fiscaliza no observa direta condição serbisu iha Direção Nacional de Farmácias e Medicamentos.

Delegação Comissão ba visita ne'e composto husi:

1. Deputada Maria Gorumali Barreto, Presidente.
2. Deputado Luís Ximenes Caldeira, Vice-Presidente.
3. Deputada Lúcia Taeki, Membro
4. Deputada Verónica Fernandes, Membro
5. Deputada Maria Teresa da Silva Gusmão, Membro
6. Deputado Helder Freitas «Kamarudin», Membro
7. Deputado António Verdial de Sousa, Substituto.

Iha visita fiscalização ne'e Deputado António Verdial da Silva Pereira, Membro, hetan substituição temporária husi Deputado António Verdial de Sousa.

La participa iha visita fiscalização ne'e Deputado Leandro Lobato, Secretário, no Deputada Helena Martins Belo, Membro, ho razão justificada.

Iha visita ne'e hetan participação máxima husi Chefe Departamento Fármaco-Vigilância, ne'ebé nu'udar mós Diretora interina, Dr.<sup>a</sup> Celeste Sam, Chefe Departamento Gestão das Autorizações de Introdução no Mercado, Sr. Teodoro de Jesus, Chefe Departamento Planificação e Gestão das Aquisições, Sr.<sup>a</sup> Rita do Rego, no funcionário sira hotu.

Iha atividade ne'e Comissão recolha informação relevante sira husi Departamento tolu ne'ebé existe iha Direção Nacional de Farmácias e Medicamentos, Departamento Fármaco-Vigilância (DFV), Departamento Gestão das Autorizações de Introdução no Mercado (DGAIM), Departamento de Planificação de Gestão das Aquisições (DPGA)...»

Atu habadak tempo, relatório sira atividade nian Ita-Boot sira bele haree cópia iha anexo, ha'u direta ba conclusão no mós recomendações.

### «...Conclusão

Husi atividade fiscalização ida-ne'e, Comissão F hato'o conclusão hanesan:

1. Direção Nacional de Farmácias e Medicamentos, direção ne'ebé responsável ba registo, avaliação no monitorização ba produtos farmacêuticos, hodi garante segurança, eficácia no qualidade ba consumidor sira.

Iha importador ne'ebé la registo iha DGAIM no la contribui hodi selu taxa ba Estado, maibé hetan benefício liuhosi acesso ba concurso, “tenderização”, iha SAMES (Serviço Autónomo de Medicamentos e Equipamentos de Saúde).

Informação detalhada iha página n.º 7 no 8.

2. Direção Nacional de Farmácias e Medicamentos submete ona relatório kona-ba infração sira-ne'ebé identifica ba Gabinete de Inspeção e Auditoria da Saúde (GIAS) maibé la iha intervenção máxima ba importador sira-ne'ebé comercializa produto farmacêutico la tuir legislação em vigor.

3. Liuhosi sistema *single window*, janela única, Autoridade Aduaneira hetan lista produtos farmacêuticos ne'ebé registo, hodi controla importação no combate circulação produtos farmacêuticos ho forma ilegal.

4. Ai-moruk sira-ne'ebé nia rotulagem la tuir Decreto-Lei n.º 12/2004, 26 de maio, atividades farmacêuticos, artigo 20.º «O rótulo dos medicamentos e folheto informativo devem conter, numas das línguas oficiais ou, transitoriamente, em inglês ou indonésio...» considera hanesan ai-moruk ilegal.

5. Alocação orçamento la tuir quantificação ne'ebé Direção Nacional de Farmácias e Medicamentos elabora no orçamento ne'ebé cada tinan fiscal aloca ba SAMES la iha aumento, ne'ebé implica ba *stock out* ne'ebé ho percentagem boot, maibé, iha parte seluk, SAMES halo compra ba liu ai-moruk sira-ne'ebé la iha qualidade no ai-moruk sira-ne'ebé substância composição la tuir *standar* Organização Mundial da Saúde nian.

Baseia ba recomendações husi Organização Mundial da Saúde no Banco Mundial, nação ne'ebé ho categoria *Middle-Income Country*, ninia alocação *per capita* entre 10 USD no 12 USD cada tinan.

6. SAMES halo aquisição no importação ba medicamento no equipamento saúde sem prévia autorização husi DNFM. SAMES mós la efetua registo ba itens ne'ebé importa mai Timor-Leste, la iha linha coordenação no comunicação ne'ebé di'ak entre SAMES no DNFM, liuliu relaciona ho *stock out* ai-moruk ho tipo sub-especialista.

7. Iha necessidade atu halo alteração ba Decreto-Lei n.º 12/2004, 26 de maio, atividades farmacêuticas, tanba decreto-lei ne'e vigente durante tinan 19 ona seidauk efetua alteração.

8. Condição infraestrutura. Edifício ne'ebé DNFM utiliza la iha condição adequada tanba partilha edifício ho Serviço Nacional de Ambulância e Emergência Médica, I.P. (SNAEM, I.P.).

9. Reforça número recursos humanos iha Departamento Fármaco-Vigilância (DFV), Departamento Gestão das Autorizações de Introdução no Mercado (DGAIM) no Departamento de Planificação e Gestão das Aquisições (DPGA).

Total funcionários hamutuk 20 pessoas, precisa halo recrutamento hodi completa mapeamento pessoal ne'ebé prevê ona iha Diploma Ministerial n.º 41/2020, de 2 de dezembro, Estrutura Orgânico-Funcional da Direção-Geral da Saúde.

Precisa investe iha formação académica ba recursos humanos, liuliu iha nível estudo licenciatura no mestrado iha área farmácia. La iha promoção grau no progressão escalão ba funcionários tuir nível educação no antiguidade ou duração tempo serviço.

10. Hahú husi tinan 2021, liuhusi acordo ho *Therapeutic Goods Administration* (TGA), DNFM haruka ona item 13 ba teste qualidade. Husi total ne'e, identifica *item* neen maka iha qualidade di'ak, item haat maka resultado teste seidauk iha no item tolu maka identificado *substandard* ka la iha qualidade.

#### **IV. Recomendação**

Liuhusi atividade fiscalização ida-ne'e, comissão hakarak recomenda ba:

##### **I. Ministério Saúde:**

1) Tau consideração no seriedade ba importador produtos farmacêuticos ne'ebé la registo iha DNFM no la contribui ba receitas Estado nian, maibé hetan oportunidade hodi tuir concurso, “tenderização”, iha SAMES.

2) Reforça papel Gabinete de Inspeção e Auditoria da Saúde (GIAS) iha fiscalização no auditoria ba importador sira ka linha estabelecimento farmacêutico privado sira atu cumpre legislação ne'ebé vigente, Decreto-Lei n.º 12/2004, 26 de maio, Atividades farmacêuticas, artigo 30.º Contraordenações e coimas.

3) Halo recrutamento ba farmacista atubele destaca iha posto entrada sira, hanesan Aeroporto Internacional Nicolau Lobato, Porto Díli, Posto Entrada Mota-Ain, Posto Entrada Mota-Masin, Posto Entrada Sakato, Posto Entrada Oesilo, Posto Entrada Pássabe no Posto Entrada Citrana.

4) Fó prioridade ba capacitação recursos humanos, liuhusi fó oportunidade atu continua estudo iha nível licenciatura no mestrado ba funcionário sira ne'ebé serbisu tinan barak ona iha DNFM ho de'it Diploma I no Diploma III.

5) Tau atenção ba funcionários ho regime geral, ne'ebé serbisu desde tinan 2007 no tinan 2009, ne'ebé hetan ona progressão escalão maibé la iha promoção grau. Tau atenção ba funcionários ho regime especial ne'ebé seidauk iha atualização salarial conforme nível educação.

6) Halo alteração ba Decreto-Lei n.º 12/2004, 26 de maio, atividades farmacêuticas, tanba decreto-lei refere la condiz ona ho realidade no exigência atual.

7) Edifício DNFM, acelera instalação rede internet no tau mós consideração ba espaço hodi acomoda pessoal ne'ebé sei halo recrutamento, atu nune'e DNFM bele iha condição serbisu ne'ebé apropriada, hodi garante funcionamento serbisu ho di'ak.

8) Transporte, atu aumenta viatura operacional hodi maximiza serbisu monitorização no supervisão ba facilidade saúde pública no privada sira.

9) Assegura alocação orçamento tuir necessidade no quantificação ne'ebé iha ba compra produtos farmacêuticos (medicamentos, consumíveis, reagentes, oxigénio no vacinas). Bainhira Governo aloca de'it orçamento ba SAMES ho montante entre 5 milhões no 7 milhões de dólares cada tinan, la bele cobre quantificação ne'ebé iha, nune'e sei fó impacto no resulta *stock out* ne'ebé ho percentagem boot.

10) Reforça competência ne'ebé atribui ba DNFM atubele sai nu'udar entidade reguladora ne'ebé iha competência no controlo ne'ebé di'ak, hodi aplica contraordenação no coima ba importador, produtor no comercializador produtos farmacêuticos ne'ebé la registo no fa'an produtos farmacêuticos *online*.

11) Cria armazém ne'ebé ho condição armazenamento adequada ka linha eletricidade ne'ebé suportável iha hospital regional, hospital *referral*, centro saúde no posto saúde, atu assegura conservação no assegura qualidade produtos farmacêuticos tuir *standard Good Pharmacovigilance Practices* (GPP) nian.

Ba SAMES:

1) Efetua registo iha DNFM hodi hetan autorização husi DGAIM, hodi assegura qualidade produto farmacêutico ne'ebé circula iha facilidade saúde pública tuir *standard OMS* no evita circulação produto farmacêutico ne'ebé la iha qualidade ou la tuir padrão OMS.

2) Hadi'a linha coordenação no comunicação ho DNFM, especialmente iha aquisição ai-moruk ho tipo subespecialista, atu nune'e ai-moruk sira ne'ebé SAMES la iha orçamento atu halo compra, DNFM bele efetua compra emergência atu nune'e reduz percentagem *stock out* ai-moruk.

## V. Aprovação Relatório

Relatório fiscalização ne'e discute iha reunião comissão, iha loron 8 fulan-agosto tinan 2023, no hetan aprovação ho votos a favor 8, votos contra 0 no abstenção 0.

Relator, Deputado Luís Ximenes Caldeira

Presidente Comissão, Deputada Maria Gorumali Barreto».

Obrigado ba atenção.

Sr.<sup>a</sup> **Presidente** (Maria Terezinha da Silva Viegas): — Obrigado, Sr. Relator, nu'udar Vice-Presidente da Comissão F, Ita-Boot bele filafali bá fatin.

Relatório fiscalização ne'ebé ohin halo leitura hotu, entrega mós cópia ida ba Sr. Vice-Ministro atu tau atenção kona-ba resultado husi Comissão F nia fiscalização.

Tuirmai, ha'u filafali ba agenda n.º 1 Apresentação e apreciação do relatório de fiscalização da Comissão D.



Ba Sr. Presidente da Comissão D e o seu Relator, faz favor.

Sr. **Presidente Comissão D** (Ricardo Baptista): — Sr.<sup>a</sup> Presidente em exercício, Sr. Vice-Presidente, Sr.<sup>a</sup> Secretária e colega Deputado sira hotu, bom dia ba ita hotu.

Obrigado ba oportunidade.

Desculpa, loloos iha agenda primeiro mak ami, maibé iha assunto balu que ami naran sá... ami bá fali iha segunda agenda.

Ba Senhor Deputado no Deputada sira hotu, ami, Comissão D, hakarak atu mai hato'ó ami-nia relatório ba fiscalização ne'ebé ami hala'ó iha dia 2 to'ó dia 3 de agosto, iha Município Covalima, liga ba problema ne'ebé *Timor Resources* ho *Timor Gap* ou Ministério Petróleo hasoru ba perfuração mina matan ne'ebé iha Suai no mós Município Ainaro. Iha visita ne'e mós ami bá visita fatin ba preparação ba produção gás no mina iha Betano iha Manufahi.

Ho ida-ne'e, Sr.<sup>a</sup> Deputada no Sr. Deputado sira hotu, ami-nia relatório iha ona Ita-Boot sira-nia mesa leten.

Sr. Vice-Ministro, bom dia ba Ita-Boot, ha'u haluha tiha.

*Deputado ne'e hamnasa.*

Ami-nia relatório iha tiha ona Ita-Boot sira-nia mesa leten, depois Ita-Boot sira bele lê de'it.

Sr. Vice-Ministro, ami-nia relatório mós kala iha Ita-Boot ona, depois Ita-Boot bele lori ida-ne'e bá Conselho de Ministros, e hato'ó mós ba Ministro. E ami hanoin katak ami la precisa atu lê hahú to'ó remata, maibé ami liu kedas ba «Recomendação» no «Conclusão», atu nune'e bele habadak ita-nia tempo. E, karik mak colega sira iha dúvida ou pergunta ruma, orsida, depois de ami lê, mak bele hato'ó direta para ita bele iha discussão ruma.

Ha'u hanoin, ho ida-ne'e ha'u passa kedas ba Sr. Secretário atubele halo leitura ba ami-nia relatório visita ida-ne'e, liu kedas ba «Recomendação» no «Conclusão».

Obrigado barak.

Sr. **Relator Comissão D** (Saul Salvador H. J. Amaral): — Obrigado ba tempo.

Ho permissão Presidente da Comissão, ha'u halo leitura ba relatório.

Ba Presidente Parlamento ho Vice-Presidente Parlamento Nacional, Vice-Ministro dos Assuntos Parlamentares, colega Deputado no Deputada sira hotu, bom dia.

### «... III. Conclusão no Recomendação

«Iha visita trabalho ne'e Comissão hasai conclusão no recomendação balu ba parte competente atu fó consideração máxima, hodi soluciona problema ne'ebé acontece entre *Timor Gap* no *Timor Resource*.

Problema ida-ne'e mosu, liuliu iha interpretação ne'ebé la hanesan ba acordo perfuração mina no gás iha Suai. Perfuração ne'ebé halo husi *Timor Resource* consegue ona iha resultado ne'ebé di'ak no bele halo exploração, hodi halo produção ba mina no gás.

Tuir expetativa companhia nian, husi mina matan tolu ne'ebé iha, ninia produção sei dura tinan 30 no bele to'o tinan 50. Maibé atu continua ba fase ida-ne'e mak ita precisa soluciona problema ne'e, atu nune'e bele fó biban ba companhia hodi hakat bá fase exploração hodi halo produção. Tan ne'e Comissão fó conclusão no recomendação sira hanesan tuirmai ne'e:

#### 3.1. Conclusão

3.1.1. Mina matan Lafaek/Weda nia perfuração ho kle'an 3119 m, mina matan Karau/Feto Kmaus ho nia perfuração ho kle'an 660 m, maibé la consegue to'o nia *target* tanba ne'e pressão gás sa'e maka'as, no mina matan Kumbili/Liurai, nia perfuração ho profundidade 1660 m.

Husi mina matan tolu ne'e, tuir resultado teste, hatudu katak iha sinal positivo, ne'ebé bele continua ba exploração hodi halo produção mina no gás ho duração tempo produção dura tinan 30 no bele to'o tinan 50.

3.1.2. Mina matan tolu ne'e, depois de resultado teste, atu tama ba fase exploração ba produção la bele continua tanba mosu ona problema entre *Timor Gap* ho *Timor Resources* iha interpretação ne'ebé la hanesan iha aspeto legal nian, liuliu iha acordo ne'ebé estabelece iha contrato sira kona-ba perfuração ba to'o iha produção. Tanba ne'e mak parte rua ne'e lakohi simu malu hodi resolve internamente no hakarak atu lori bá resolve liuhusi dalan judicial.

3.1.3. Problema ida-ne'e durante tinan tolu seidauk iha solução ruma, nune'e implica ba atividade perfuração no mós plano ba produção mina no gás iha terreno parado até agora.

3.1.4. Questão ida-ne'e, Comissão D, depois rona tiha husi parte companhia *Timor Resources*, tuirmai realiza kedas audiência ho Governo, liuhusi Ministro ba Assunto Petróleo no Recursos Minerais, no Ministro promete ona ba Comissão katak iha tempo badak sei resolve problema ne'e.

3.1.5. Tuir relatório ne'ebé *Timor Recources* apresenta ba Comissão D, husi perfuração mina matan hirak-ne'e, desde hahú to'o agora, *Timor Recources* gasta ona nia osan rasik hamutuk 70 milhões de dólares no parte *Timor Gap* seidauk contribui nia parte.

3.1.6. Mina matan Rusa, tuir estudo sísmico ne'ebé iha, hatudu katak iha potencial boot tebes, maibé seidauk halo perfuração no preparação iha terreno quase hotu ona no hein de'it atu mobiliza

equipamento sira husi Suai bá hodi halo perfuração. Tuir plano, tinan oin, 2024, bele halo ona perfuração quando problema ne'ebé ho *Timor Gap* hetan ona solução.

3.1.7. Fatin ne'ebé planeia ona atu harii centro produção no processamento gás localiza iha Feriksare, Betano. Iha fatin ne'e, iha fase inicial, sei halo processamento hodi fornece de'it ba Central Elétrica Betano, maibé quando *pipeline* dada completo husi Suai ba iha fatin refere, sei fornece hotu ba Central Elétrica Hera, hodi nune'e bele hamenos ona custo importação mina husi rai-li'ur ba central elétrica rua ne'e, ne'ebé durante ne'e ho custo ida-ne'ebé boot tebes.

## 3.2. Recomendação

3.2.1. Recomenda ba Governo atu acelera processo ne'e ho lais hodi soluciona problema ne'ebé acontece entre *Timor Gap* ho *Timor Resources*, atu nune'e bele fó biban ba companhia hodi continua atividade perfuração ba exploração, hodi halo produção mina no gás no mós hodi continua halo perfuração ba mina matan sira-ne'ebé identificado ona;

3.2.2. Recomenda ba Governo atu revê filafali regra ne'ebé iha, hodi anula acordo atual no husu, se bele, hamosu fali acordo foun ne'ebé claro, atu nune'e evita mosu interpretação diferente husi parte rua;

3.2.3. Recomenda ba companhia *Timor Gap* ho companhia *Timor Resources*, atu resolve problema ne'e internamente no la precisa atu liuhusi dalan judicial ka tribunal;

3.2.4. Ba assunto ida-ne'e, Comissão D declara ona katak iha Comissão nia laran la iha oposição, maibé ho unanimidade, fó apoio total ba Governo hodi resolve problema refere;

3.2.5. Liuhusi biban ida-ne'e, Comissão D husu ba Sr. Deputado no Deputada sira atu hotu-hotu iha hanoin ka lian ida de'it hodi fó apoio ba Governo, karik Governo husu apoio liuhosi aprovação orçamento ruma hodi bele soluciona problema ida-ne'e, tanba assunto ida-ne'e la'ós interesse privado ka grupo, maibé interesse nacional no sei lori benefício boot ba Nação no Povo ida-ne'e.

## IV. Aprovação

Relatório ne'e hetan ona aprovação liuhusi reunião ordinária Comissão nian, ne'ebé realiza iha laron quarta-feira, 9 de agosto de 2023, tuku 11h00, horas Timor-Leste, iha sala Comissão D Parlamento Nacional.

Processo aprovação hetan participação husi membro Comissão na'in-ualu, ho resultado aprovação a favor 8, contra 0 no abstenção 0.

## V. Lian Ikus

Ida-ne'e mak relatório visita trabalho Comissão Economia no Desenvolvimento nian bá iha Município Covalima, haree mina matan Lafaek ka Weda, haree mina matan Karau ka Feto Kmaus no haree mina matan Kumbili ka Liurai.

No bá iha Município Ainaro, haree mós mina matan Rusa, e bá iha Município Manufahi visita mós fatin instalação ba produção no processamento gás iha Feriksare, Betano, no husu ba Governo atu considera relatório ne'e ho urgência.

Ba atenção tomak, hato'o obrigado wa'in.

Presidente da Comissão, Deputado Ricardo Batista

Relator, Deputado Saul Salvador H. J. Amaral».

Obrigado, Presidente.

**Sr. Presidente da Comissão D** (Ricardo Batista): — Obrigado, Sr. Secretário.

Ida-ne'e mak relatório ne'ebé ami halo kona-ba visita iha dia 2 to'o dia 5 de agosto iha Município Covalima, Ainaro no mós Manufahi. E, atu fó-hanoïn hela ba colega Deputado sira katak problema ida-ne'e quase besik tinan tolu ona la iha solução, problema ne'e tanba interpretação ba contrato ou acordo ne'ebé la hanesan husi *Timor Gap* no *Timor Resources*, e ne'e mak hodi hapara hela processo perfuração.

Perfuração iha fatin rua ou fatin tolu la'o ona e preparação tan ba ida, e parado hela ba nia processamento to'o agora. Tuir companhia ne'ebé hato'o mai, se problema ne'e mak resolve ona, iha fulan 18 ita bele hetan ona resultado ou sira produz ona mina no gás. Se problema resolve ohin, sura ba oin fulan 18, sira bele resolve ona.

Ho ida-ne'e mak Comissão D sente katak problema ne'e nu'udar problema Nação nian, problema ita hotu-hotu nian, e urgentemente ami halo audiência ho *Timor Resources* ho Ministério do Petróleo, e ami halo kedas visita bá iha-ne'ebá.

Problema ne'e la'ós foin iha VI Legislatura mak hasoru, iha V Legislatura, ami iha Comissão D hasoru problema, bolu *Timor Gap*, bolu ANPN, bolu Ministro do Petróleo, bolu *Timor Resources*, mai resolve problema, maibé la iha solução. Ne'ebe, ho ida-ne'e, ami-nia visita ida foin daudaukbá ne'e, ho relatório ne'ebé ami halo, recomendação ne'ebé ami halo, bele hetan solução ba problema ida-ne'e karik.

Ida-ne'e mak ami Comissão D nia relatório.

Ba Presidente, Vice-Presidente, Sr. Vice-Ministro no ba colega Deputada no Deputado sira hotu, obrigado wa'in.

Sr.<sup>a</sup> **Presidente** (Maria Terezinha da Silva Viegas): — Obrigada, Sr. Presidente da Comissão D e Sr. Secretário da Comissão, bele filafali ba fatin.

Sr. Vice-Ministro, tendo em conta relatório mós Ita-Boot simu ona, tuirmai ita hakat ba, molok atu fó intervenção ba Deputado sira, aqui regista, declaração política husi Bancada KHUNTO, ho nune'e ha'u fó tempo.

Muito obrigada.

Sr. **António Verdial de Sousa** (KHUNTO): — Muito obrigado, Sr.<sup>a</sup> Presidente em exercício, Sr. Vice-Presidente, Sr.<sup>a</sup> Secretária da Mesa, Sr. Vice-Ministro ne'ebé trata assunto parlamentar, distinta Deputada no Deputado iha Uma-Fukun ida-ne'e mak ha'u respeita.

Ohin loron Bancada KHUNTO hakarak halo declaração política liga direta ba assunto implementação Programa Merenda Escolar.

Haree ba preâmbulo Decreto-Lei n.º 61/2022, ne'ebé aprova Programa Merenda Escolar, ita compreende katak ai-han mak fator ida-ne'ebé importante ba desenvolvimento kakutak no hanoin labarik ida nian, ne'ebé bele afeta buat sira seluk hanesan inteligência, aprendizagem, memória, concentração no estado vigilância iha contexto escolar. Ho nune'e mak Bancada KHUNTO ohin halo declaração política liga diretamente ba Manual Merenda Escolar.

Iha tinan 2005, Governo, liuhusi serbisu hamutuk entre Ministério Educação, Juventude e Desporto, Ministério Saúde no Programa Mundial ba Ai-han ka *WFP (World Food Programme)*, hahú implementa Programa Merenda Escolar, no iha tinan 2012 ita-nia Governo rasik mak hahú gere Programa Merenda Escolar iha território nacional, tuir modelo ne'ebé iha ona.

Iha tinan 2013, Ministério da Educação, Juventude e Desporto hamosu matadalan ka manual operacional ba implementação Programa Merenda Escolar ne'ebé sei nafatin usa to'o ohin loron no halo revisão hodi hetan aprovação iha tinan 2023, liuhosi Direção Nacional de Ação Social Escolar e Assuntos Sanitários Ministério Educação, Juventude, Desporto, no Direção Nacional de Finanças Municipais Ministério Administração Estatal.

Ita haree no acompanha iha tinan hirak nia laran, implementação Programa Merenda Escolar iha nação República Democrática Timor-Leste ne'ebé continua nafatin la iha mudança iha hadi'a qualidade ai-han, ne'ebé oan sira consume no hasa'e quantidade ba micronutriente ne'ebé oan sira precisa tebes.

Objetivo husi Programa Merenda Escolar maka hamenos hamlaha, hamenos deficiência husi micronutriente no anemia, no mós oferece nutrição di'ak ba ita oan sira iha escola.

Governo cria ona matadalan ka manual implementação Programa Merenda Escolar, atu nune'e sai matadalan implementação ba presidente autoridade municipal sira, administrador município, diretor serviço educação municipal, saúde, finanças, agricultura, segurança alimentar, agência

fiscalização municipal no agência planeamento municipal, ho sira ida-idak nia equipa serbisu, inclui ba sira ne'ebé sai hanesan implementador iha Programa Merenda Escolar ne'e rasik, mak hanesan: coordenador escolar central no filial sira, organizações comunitárias, hanesan suco ka conselho suco, no mós associação inan-aman no manorin-na'in sira.

Wainhira ita lê matadalan ne'e, iha ita-nia imaginação Programa Merenda Escolar ne'e furak tebes enquanto matadalan ne'e implementa loloos no momoos iha terreno, tanba hatuur ona ho claro, ho objetivo, base legal, beneficiário, implementador sira-nia knaar no obrigação, autoridade sira-nia papel, contrato conceção subvenção pública ba Programa Merenda Escolar rasik, mecanismo financiamento, inclui nia regra sira, procedimento aprovisionamento refeição escolar, inspeção no auditoria, monitorização no avaliação ba implementação Programa Merenda Escolar ne'e rasik, no mós iha arquivo no figura ne'ebé reflète lala'ok husi implementação Programa Merenda Escolar tuir matadalan nutrição no ai-han seguro.

Ita hatene katak osan ba merenda escolar cada estudante 42 centavos cada loron. Iha tinan hirak liubá osan merenda escolar hahú ho 32 centavos por estudante cada loron, maibé ho montante ida-ne'e hamosu *challenge* ka desafio barak, hamosu halerik. Ho montante osan ki'ik la suficiente hodi bele hatán ba objetivos Programa Merenda Escolar ne'e rasik, tanba ne'e, iha tinan 2022, Parlamento Nacional, husi Uma-Fukun ida-ne'e, aprova orçamento ba Programa Merenda Escolar ho montante 42 centavos ba cada estudante ba cada loron.

Montante osan hasa'e no manual iha ona, maibé sei mosu falhanço desempenho iha implementação Programa Merenda Escolar iha terreno, liuliu iha áreas urbanas, rurais, remotas no extremamente remotas iha território nacional. Na realidade, oan sira continua consume ai-han ne'ebé qualidade ladún di'ak, liuliu oan sira ne'ebé escola iha município, foho, áreas rurais, remotas no extremamente remotas. Labarik sira sei continua han etu mutin ne'e mak barak liu do que ai-han micro nutriente sira.

Facilidade iha escola hodi suporta Programa Merenda Escolar, hanesan dapur, armazém, saneamento, bee moos no equipamento seluk ne'ebé hodi suporta ba programa merenda escolar sei falta ho condições ne'ebé la favorável.

Hanesan Deputado, liuhusi biban Plenária ida-ne'e, fó-hatene ba Governo liga ba falhanço sira mak hanesan tuirmai: ida, condições dapur la di'ak, la iha fatin hodi fase bikan no modo sira, bee moos la iha, armazém ba rai ai-han fresco la iha no la iha geleira hodi rai ai-han fresco; Labarik sira sei continua han iha li'ur, tuur de'it iha rai, hola mahan iha ai-hun hodi han; Cozinha no cozinheiro sira sei continua oferece ai-han bandu sira, hanesan *Masako* ka *Ajinomoto*, ba oan sira hodi consome; Fornecedor ka cozinheiro sira la iha vencimento permanente ka salário ba sira-nia serbisu ne'ebé sira oferece ba hodi te'in ai-han ba oan sira, orçamento ba sira-nia kolen maka inclui ona iha orçamento de 42 centavos ne'e, inclui mós logística no transportação hodi distribui ai-han ba escola; Equipa gestão

ba Programa Merenda Escolar la iha conhecimento ba nutrição ai-han seguro no mós higiene no «sanitação».

Excelência distinta Deputada no Deputado, hanesan ema timoroan ida-ne'ebé *kebetulan* sai nu'udar Deputado, liuhusi Bancada Kmanek Kaburas Unidade Nacional Timoroan, iha obrigação fó-hatene ba Governo, no Governo tem que hola responsabilidade hodi hadi'a falhanço sira-ne'ebé ha'u haklaken ona iha leten.

Hadi'a liuhusi saida? Hadi'a ninia mecanismo no sistema. Ita cria equipa gestão ba Programa Merenda Escolar, maibé ita la halo controlo ba serbisu equipa gestão Merenda Escolar ne'e rasik.

Ita-nia Nação ne'e menos iha controlo de qualidade ka *poor of quality control*. Serbisu tomak tem que halo tuir matadalan ne'ebé hatuur ona, karik iha falhanço balu mosu iha implementação, tem que halo avaliação no revisão hodi muda lala'ok ida-ne'e.

Ita-nia agricultores ka to'os-na'in local nia produtos la iha mercado ba sira hodi hola sira-nia produto, oinsá ita cria mecanismo ida-ne'ebé di'ak no iha sustentabilidade liuhusi Programa Merenda Escolar ba to'os-na'in local? Equipa gestão Merenda Escolar tem que sosa produto local sira ne'ebé to'os-na'in local rasik mak produz hodi oferece ba escola.

Ikusliu, hanesan Deputado ne'ebé mai husi Kmanek Haburas Unidade Nacional Timoroan, ha'u hakarak cita uitoan liafuan furak iha Matadalan Merenda Escolar – *kebetulan*, Na'i no Lou distinto Deputado sira, manual ne'e ha'u rasik iha – iha edição daruak página n.º 23 dehan ho liafuan seluk, «osan ne'ebé implementador simu husi autoridade ka administração municipal sira la'ós osan despesa baibain ka osan esmola husi Estado, maibé osan ne'e atu assegura beneficiário sira-nia direito. Wainhira beneficiário sira la hetan ninia direito ba refeição lora-lora ho conteúdo rua, mak saudável no equilibrado, significa, financiamento husi Estado ba Programa Merenda Escolar la atinge ninia objetivo».

Ho liafuan furak ida-ne'e, hanesan Deputado, ha'u ko'alia loloos de'it, katak se la atinge ninia objetivo maka di'ak liu hasai tiha, do que ita gasta osan maka'as, maibé ninia objetivo ne'e rasik ita la alcança.

Rohan ba ne'e declaração política Bancada KHUNTO ohin lora, ne'ebé declara husi Vice-Presidente Bancada KHUNTO nian, António Verdial de Sousa.

Muito obrigado.

Sr.<sup>a</sup> **Presidente** (Maria Terezinha da Silva Viegas): — Obrigado, Sr. Vice-Chefe Bancada do KHUNTO.

Bele providencia mós cópia ida mai Mesa no bá Governo kona-ba declaração política ne'ebé distinto Deputado hato'o.

Tuirmai, ha'u loke ba inscrição. Iha ona Mesa 10 Deputados inscritos, ha'u fó tempo, no mós atu halo apreciação dala ida de'it ba relatório da fiscalização comissão rua ne'e nian. Ho nune'e ha'u hahú ho distinto Deputado Gabriel Soares.

Faz favor.

Sr. **Gabriel Soares** (CNRT): — Obrigado, Presidente em exercício.

Bom dia ba Ita-Boot, ba Vice sira, Secretária, bom dia ba Vice-Ministro dos Assuntos Parlamentares, colega Deputado sira, mídia e audiência tomak.

Ha'u-nia assunto ha'u foti ne'e kona-ba relatório Comissão F nian.

Ida, liga ba assunto ohin dehan «terceira idade», maibé iha-ne'e ha'u temi dehan idosos, ami husu ba Comissão F atu haree mós lista pagamento subsídio ba idoso sira, tanba ha'u iha dados husi Município Manatuto, desde tinan 2019 ho nia montante 142 idosos, to'o tinan 2023 idosos 142 ne'e seidauk hetan direito ba subsídio, to'o agora. Tanba relatório Comissão F liga ba assunto ne'e, e então ha'u mós liga diretamente kedas ba assunto ne'e, além de ba Comissão F, e Excelência Vice-Ministro dos Assuntos Parlamentares iha-ne'e, bele toma nota hela para bele tau atenção ba direito subsídio ba idosos.

Ha'u sente, kala iha município seluk mós acontece, maibé dados ne'ebé ami iha, husi Município Manatuto, total 142 idosos, hahú husi 2019 até ohin, 2023, seidauk hetan direito ba pagamento subsídio.

Ne'e primeiro.

Segundo, ha'u liga nafatin mós ho relatório fiscalização husi Comissão F, liga ba assunto saúde, primeiro, ha'u ko'alia kona-ba compra de medicamentos. Tanba ohin iha relatório hatete, «Governo fó de'it orçamento 5 milhões dólares ba SAMES hodi compra ai-moruk», sira la bele compra ai-moruk ho quantidade boot.

Maibé, ha'u mós iha informação katak Governo tau osan, husi kedas uluk mai to'o agora, ba SAMES, maibé realidade ne'ebé ita hotu acompanha, iha mídia social horikalan ka horisehik kalan sai hela, ba compra ai-moruk la tuir organismo população Timor nian. Hanesan *Paracetamol*, bá compra ai-moruk iha Índia, mai iha-ne'e *Paracetamol* nia cor ne'e muda. Ita bá soe osan. Compra ai-moruk ne'e ba povo, povo mak precisa liu ai-moruk ne'e, tanba ne'e ami husu para compra ai-moruk, haree! Item ne'ebé, karik Ministério Saúde tun ba kraik, bá *health post*, bá iha centro saúde sira, identifica husi ne'ebá precisa ai-moruk saida.

Agora daudaun, Sr. Vice-Ministro, ai-moruk *stock* iha centro saúde e *health post* sira mamuk, hanesan *antipirético*, *analgético*, antibiótico, la iha, ai-moruk povo nian ne'e la iha. Tanba ida-ne'e mak ami husu para tem que tau atenção ba SAMES ne'e, tanba SAMES hetan orçamento, hanesan uluk liubá, dehan hetan 5.000.000 USD, agora foin daudauk retificativo, se Presidente promulga karik,



hetan 6.000.000 USD. Bá compra ai-moruk ne'e la precisa bá to'o iha Índia, bá Indonésia ne'e di'ak hela, *Paracetamol* ne'e han ho ita-nian, ai-moruk seluk ne'e han ho ita-nian, la precisa to'o loos iha Índia ne'ebá e mai para ai-moruk *Paracetamol* ida nia cor ne'e muda tiha. Ida-ne'e bele afeta ba saúde ita-nia comunidade e população em geral. Ami husu tau atenção!

E husu mós iha SAMES nia orçamento mai agora atu compra mós oxigénio. Iha centro saúde sira iha posto e iha cada *health post* iha suco sira, tau oxigénio! Tanba acontecimento iha-ne'ebá difícil la halimar ba médico sira, enfermeiro sira, atu halo atuação emergência, susar. E balu la hetan assistência kona-ba oxigénio, atu *drop* mai iha município, mai iha nacional, nia vida la to'o iha fatin, vida kotu iha dalan klaran. Husu para tau atenção ba ida-ne'e.

E terceiro, ami husu ba Governo, liuhusi Ministério Saúde, favor atu identifica fali ita-nia alin sira medicina balu, la'ós hotu-hotu, halo transferência ka muda hotu mai iha Guido Valadares, e halo *health post*, centro saúde sira iha ita-nia posto administrativo sira balu mamuk. Povo halerik, atu bá consulta susar tebetebes.

Sr. Vice-Ministro ita bele *check* iha Hospital Nacional Guido Valadares, ita bele hetan iha-ne'ebá, pessoal medicina hira mak balu husi posto administrativo ou *health post* ho centro saúde sira, agora sira iha hotu HNGV.

Iha kraik povo precisa tanba momento bá escola ne'e identifica kedas ona katak tau iha *health post*, tau iha centro saúde sira, cada centro saúde ida medicina ne'e ida, mas agora tanbasá mak halo transferência mai hotu iha Guido Valadares e husik povo iha kraik ne'e sofre? Paciente susar atu hetan tratamento. Ida-ne'e ami husu para Governo, liuhusi Ministério Saúde, favor *check* situação ida-ne'e.

Ha'u aprecia declaração ida husi Bancada KHUNTO kona-ba assunto merenda escolar ne'e, sim, precisa tau matan, liuliu kona-ba ninia higiene e kona-ba nia equipamentos. Ninia implementação la'o, maibé kona-ba higiene e equipamentos, dapur, bikan sira, kanuru sira, precisa atu haree didi'ak fali atubele garante ita-nia oan sira-nia saúde e para sira bele acompanha ensino aprendizagem ida-ne'ebé di'ak liután.

Obrigado.

Sr.<sup>a</sup> **Presidente** (Maria Terezinha da Silva Viegas): — Obrigado, Sr. Deputado.

Husu ba distinto Deputado sira, em vez de ha'u mak atu buti micro iha-ne'e mean, fó sinal, convém ida-idak economiza nia tempo dentro de cinco minutos.

Tuirmai, distinto Deputado Anacleto Freitas.

Faz favor.

Sr. **Anacleto Freitas** (CNRT): — Obrigado ba tempo.

Presidente Parlamento em exercício ho composição Mesa mak ha'u respeita, Vice-Ministro dos Assuntos Parlamentares, Deputado e Deputada sira hotu, mória no povo rona-na'in tomak mak ha'u respeita.

Ha'u hakarak, iha-ne'e, atu ko'alia uitoan kona-ba estrada ba Viqueque nian, liga husi Builale to'o Rate Casana. Companhia ida-ne'ebé kaer iha-ne'ebá ne'e tinan 18 ona, maibé nia halo la hotu, e ami rona dehan *black list* tiha ona. Maibé, foin daudaun, semana ba kotuk, ami haree nia atu começa fali ona, tanba ne'e mak ita-nia veterano sira, ita-nia autoridade local sira no administrador posto sira halo protesto kona-ba ida-ne'e. Tanba ne'e mak ha'u, nu'udar representa povo mai tuur iha Uma-Fukun, sira hato'o hela sira-nia preocupação mai ha'u, ha'u foti iha-ne'e, atu nune'e Vice-Ministro dos Assuntos Parlamentares, karik bele, encaminha e forma equipa ruma atubele bá haree, tanba saida mak *blacklist* tiha ona tinan 18 ona, la la'o tiha ona, maibé agora haruka atu la'o filafali ona. Ha'u hanoin, ida-ne'e ladún di'ak. Estrada ida-ne'ebá nia condição mós ita hotu hatene, ita hotu haree, tanba ne'e companhia ida-ne'ebé kaer karik, nia la bele ona ne'e fó filafali ba companhia seluk. Ha'u hanoin, labele ida-ne'e mak atu repete, repete, para depois povo mak sai vítima ba processo ida-ne'e.

Ne'e primeiro.

Segundo, ha'u, foin daudauk tun bá, rona informação balu, iha queixa balu, ko'alia kona-ba Ministério bombeiros nian. Iha Ministério bombeiros nian ne'e, ninia comandante bombeiros ne'e fulan ida tama de'it semana ida, e dala ruma la to'o, ida hela iha Díli, ida hela iha Oe-Cusse, maibé sira-nia lista presença ne'e *hadir* hela de'it fali, tanba ne'e mak ema balu preocupa hela ho buat sira-ne'e.

E nune'e mós, ligado ba serviço ba comunidade, quando comunidade iha acidente ruma, halai to'o mai bombeiros ne'e nia comandante la iha. Tanba ne'e preocupação ita-nia povo sira-nian, no mós ba ita-nia ema sira-ne'ebé iha ministério relevante hato'o hela, tanba ne'e mak ha'u foti iha-ne'e atu nune'e Vice-Ministro dos Assuntos Parlamentares, karik bele, hato'o hela ba direção competente para bele haree tuir buat ne'e, ita labele halimar.

Iha ministério balu falta loron rua-tolu de'it chamada kedas ona, maibé ida-ne'e, nia mak comandante Bombeiros, mas bele semana rua tolu la tama, iha lista ne'e tama hela de'it fali. Ida-ne'e mak preocupação ita hotu nian be ha'u foti hela iha-ne'e, karik bele Vice-Ministro dos Assuntos Parlamentares coordena no haree to'ok buat ida-ne'e.

Obrigado ba tempo.

Sr.<sup>a</sup> **Presidente** (Maria Terezinha da Silva Viegas): — Obrigado, Sr. Deputado.

Atu fó-hanoin de'it katak Bombeiros ne'e la'ós ministério ida, maibé direção ida iha parte Proteção Civil nian.

Inscrição ha'u taka ona.

Tuirmai, Deputado Antoninho Sarmiento.

Faz favor.

Sr. **Antoninho Doutel Sarmiento** (FRETILIN): — Obrigado ba tempo.

Bom dia ba Presidente em exercício no componente da Mesa, Vice-Ministro dos Assuntos Parlamentares, colega Deputado e Deputada sira, mília no povo doben Timor-Leste.

Iha-ne'e ha'u atu questiona assunto ida que importante tebetebes, liuliu escola sira técnica agrícola nian.

Iha 19 de agosto ha'u iha Natarbora, haree liu escola ne'e, mestre sira apresenta, escola ne'e ita-nia Ministro Agricultura hakarak foti Escola Técnica Agrícola Natarbora, Fuiloro no Maliana integra ba Ministério da Educação.

Diretor escola sira preocupado tebetebes ho escola ida-ne'e, no iha pergunta barak mosu ba sira: tanbasá Ministro Agricultura hakarak integra filafali escola sira-ne'e diretamente ba Ministro Educação? Tanba escola ne'e, hakarak ka lakohi, tem que iha competência Ministro Agricultura nian para haree, hodi tau prioridade ba escola ne'e atu hasa'e recurso ne'ebé mais qualidade, para eleva ita-nia produção agrícola sira bele la'ó ho di'ak, tanba ita hatene, ita-nia moris ne'e vital tebetebes ho agricultura. Se ita hamlaha, la bele han fali computador, tem que han hahán, então formação ida formal iha nível agricultura ne'e tem que haree didi'ak.

Tanba ne'e mak diretor escola sira preocupado tebetebes. Bainhira sira apresenta sira-nia programa no orçamento ba Ministro Educação, Ministro Educação admira tebetebes tanba osan boot, tanba ne'e mak sira husu tebetebes tansá Ministro Agricultura hakarak integra escola técnica vocacional ne'e filafali ba Educação. No iha ona estudo ruma hatudu katak bele ka lae muda escola ne'e ba Educação? Tanba ne'e sira husu. Ne'e importante tebetebes atu haree, tanba escola ne'e rasik produz ita-nia jovem barak para depois jovem sira iha nível agricultura ne'e harii grupo, no produção agrícola barak mak hatama ba ita-nia supermercado sira-ne'e mai husi produto escola técnica agrícola nian.

Segundo, ohin, relatório Comissão Saúde nian ko'alia kona-ba assunto fiscalização sira, iha quarta, quando debate orçamento iha-ne'e, paciente ida telefone mai ha'u katak nia simu receitas husi doutor iha fatin emergência nian kona-ba rins, tem que simu receitas ne'e hodi bá sosa ai-moruk iha Foho Osan Mean, e total osan ne'ebé precisa atu sosa ai-moruk ne'e 162 USD. Povo ida simples, nia bá iha-ne'ebá, simu receitas atu bá sosa fali ai-moruk, iha osan ka lae? Ha'u hanoin, tem que haree ida-ne'e para acelera se orçamento sira-ne'e iha ona.

Ida-ne'e mak precisa, hanesan informação, atu hatete daudaun iha-ne'e, no husu ba Vice-Ministro dos Assuntos Parlamentares atu tau atenção forte liu mak iha nível ida escola técnica vocacional sira. Ami hanoin, ida-ne'e importante tebetebes.

Obrigado.

Sr.<sup>a</sup> **Presidente** (Maria Terezinha da Silva Viegas): — Obrigado, Sr. Deputado.

Tuirmai, Sr. Deputado Mateus de Carvalho.

Halo favor.

Sr. **Mateus da Cruz de Carvalho** (CNRT): — Bom dia ba Sr.<sup>a</sup> Presidente em exercício, composição da Mesa, Vice-Ministro dos Assuntos Parlamentares, distinto no distinta Deputado sira mak ha'u respeita.

Iha-ne'e iha questão rua mak ha'u hakarak foti.

Primeiro, kona-ba sinal trânsito sira-ne'ebé iha capital Díli começa aat daudauk ona. Ita haree, *lampu merah* sira-ne'e quase maioria la funciona, balu mak funciona e balu começa, ita haree, aat daudauk ona, e sinais ne'ebé tau iha cruzamento sira-ne'e quase maioria lakon hotu no estragos. No mós *zebra cross* iha Díli laran ne'e, qualidade la iha, tinta sira-ne'e mós começa lakon.

E depois, ita haree rasik, iha Parlamento nia oin ne'e *zebra cross* ne'ebé sira tau kedas iha cruzamento, ita-nia visto ka *jarak pandang* ne'e ita tama cruzamento ita hetan kedas *zebra cross*, quer dizer que ita la consegue hetan ema atu ultrapassa iha *zebra cross*, ita tama tiha cruzamento foin mak hetan ema.

Ha'u hanoin, Direção Nacional de Transportes Terrestres tem que haree didi'ak ida-ne'e tanba sempre acontece ida-ne'e, tanba ne'e ha'u hanoin katak ida-ne'e tem que haree, e orçamento retificativo tau ona, karik bele, haree hadi'a sinal trânsito sira-ne'e, liuliu kona-ba *zebra cross* ne'ebé qualidade la iha, tinta sira-ne'e ita haree foin lailais mak monta ka pinta mas daudauk ne'e quase tinta sira-ne'e lakon hotu filafali ona. Ne'e primeiro.

Segundo, atu foti kona mós ba recrutamento estudantes foun iha Universidade Nacional Timor Lorosa'e (UNTL) no mós iha Instituto Politécnico Betano (IPB). Iha recrutamento ba estudante foun sira-ne'e, ita hatene katak recrutamento, iha tinan hirak liubá ne'e, Ministério Ensino Superior mak halo ba estudante foun sira-ne'e, e ha'u hanoin katak se Ministério Ensino Superior mak halo fali recrutamento ba estudante foun sira-ne'e, ita iha universidade pública ne'e rua de'it, Instituto Politécnico Betano ho UNTL. Se instituto ka universidade pública sira-ne'e mak to'o 20 resin karik, ha'u hanoin, ministério mós tem que recruta ema ne'e quase rihun resin para bele acomoda ida-ne'e. Tanba ne'e husu ba Ministério Ensino Superior atu fó filafali recrutamento estudante sira-ne'e ba cada

instituto ou universidade sira-ne'ebé iha competência atu halo recrutamento ba estudante foun sira-ne'e.

E recrutamento ida-ne'e mós, ita haree, iha canal barak tebetebes, iha regime geral ne'e quase lubuk boot ida mak tama, ne'e quase 70%. Ne'e iha veterano sira, iha polícia, iha cidadão estrangeiro, iha barak tebetebes mak tama iha-ne'ebá, quer dizer que la fó espaço ba ema povo kbiit-laek nia oan sira atu tuir, atu tama iha-ne'ebá, tanba ne'e mak husu para recrutamento estudantes foun ne'e filafali ba Universidade Nacional ou ba instituto sira-ne'e.

E depois, recrutamento sira-ne'e tem que tuir teste, labele ita tama ho regime geral, regime especial, depois to'o tempo mai estudante sira tama, la tuir teste, cada ema ida hatama nia ema e universidade nia pasta ne'e cada vez simu de'it ema 1500, tama husi regime sira-ne'e bele *over* tiha to'o 3000 ka 4000 estudantes, depois facilidade Universidade Nacional rasik la to'o ka la suficiente atu acumula estudante sira-ne'e hotu.

Ha'u hanoin, ida-ne'e husu ba Ministério Ensino Superior, liuliu Sr. Vice-Ministro iha-ne'e, bele encaminha informação sira-ne'e ba Ministério do Ensino Superior para fó filafali knaar recrutamento estudante foun sira-ne'e ba Universidade sira ho Instituto Politécnico Betano, e depois ba universidade, recrutamento ba estudante foun sira-ne'e tem que liuhusi teste, labele tama husi canal especial ka sira regime especial sira-ne'e.

Ha'u hanoin, ida-ne'e mak ha'u-nia intervenção, e, dala ida tan husu Sr. Vice-Ministro para toma nota e informa ba Ministério Ensino Superior para haree questão ida-ne'e.

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, Sr. Deputado.

Tuirmai, Deputado Luís Roberto.

Sr. **Luís Roberto da Silva** (KHUNTO): — Obrigado, Sr.<sup>a</sup> Presidente Parlamento Nacional.

Bom dia ba Ita-Boot, membro da Mesa tomak. Bom dia mós Excelência Sr. Vice-Ministro no colega Deputado e Deputada sira.

Iha-ne'e ha'u hakarak ko'alia uitoan kona-ba ita-nia comunidade sira-ne'ebé hanesan moras mental ne'e.

Moras mental ne'e agora iha Díli laran barak demais, dala ruma ha'u foti iha Parlamento kala dala rua dala tolu ona, maibé ita-nia Estado ka Governo seidauk cria condição ba sira. Quase Díli laran ne'e ita liu bá liu mai ne'e sempre hetan, tanto feto ka mane, ema moras mental barak loos, balu la'o molik hela iha ita-nia oin, ita haree hela, boot sira mós liu bá liu mai haree hela, mas de vez em quando desliga tiha de'it. Maibé, sira mós cidadão timoroan, precisa ita cria condição ba sira.

Ita ko'alia kona-ba saúde pública, sira mós moras, ne'e saida mak ita atu halo ba sira? Na'i Vice-Ministro mós kala hatene e haree mós, karik iha encontro ruma bele encaminha hela ba Ministro ne'ebé toma conta ba ida-ne'e para tau matan ba ita-nia ema sira-ne'e.

Segundo, ha'u hakarak sekunda mós ha'u-nia maluk Deputado Verdial nia declaração sobre merenda escolar, loos duni katak precisa hadi'a nia menu ne'e iha-ne'ebá, e cria mós condição escola ne'e ho di'ak, de vez em quando dapur atu te'in de'it mós la iha. Ita atu hadi'a nutrição ka atu cria tan má nutrição ba ita-nia oan sira? Escola de'it mós bee moos la iha, bá kuru bee dudu *gerobak* mak hodi fase bikan, hodi te'in, ida-ne'e mak dehan katak atu hasa'e nutrição di'ak? De vez em quando ladún. Ita halo tuir nação sira seluk hodi foti referênciá, mas de vez em quando Timor ne'e problema uitoan, tanba bee moos de'it iha escola la iha, condição mós ladún di'ak então ita precisa atu haree ida-ne'e.

Terceiro mak ha'u hakarak ko'alia uitoan kona-ba situação agora ne'e, liuliu iha Díli laran ne'e, sempre, iha madrugada tuku 2 ka tuku 3 ne'e, ema tuda malu, jovem sira sempre assalta malu entre grupo arte marcial sira, ne'ebe ita husu nafatin ba ita-nia segurança, PNTL sira, bele halo vigilância máxima nafatin iha tempo kalan to'o dadeer para bele haree. Maski ho número PNTL ne'ebé ki'ik, mas ha'u fiar katak sira-nia profissional ne'e bele serbisu ho di'ak liután para bele haree ita-nia joven sira-ne'ebé dadeer-saan tuku 1 ho tuku 2 começa dere besi, depois tuda malu, assalta malu. Ne'e cria instabilidade iha rai laran, ita precisa haree mós ba ida-ne'e. Ita hatene claro que hanesan *lapangan kerja* ne'e iha Timor la iha duni, maibé ha'u fiar katak jovem sira-ne'e mós criativo iha sira-nia moris, não é? Serbisu barak, mas tanba saida mak tuda malu hela de'it ne'e, husu to'ok. Arte marcial sira-ne'ebé ninia membro sira halo crime hela de'it, halo problema hela de'it ne'e, bolu líder arte marcial sira-ne'e ninian mai para ko'alia. Ida-ne'e nação, la'ós arte marcial ida atu manda filafali nação ho Estado ida-ne'e!

Ne'e ha'u foti mós referênciá husi Sr. Vice Ministro nia intervenção uluk, ne'ebe Ita-Boot agora nu'udar membro do Governo, halo nu'usá para ita bele haree ida-ne'e. Uluk iha Parlamento Ita-Boot mós ko'alia kona-ba ida-ne'e, agora bá fali ona iha Governo ne'e, mais ou menos implementa to'ok buat ne'e. Maski la'ós Ita-Boot nia competência, Ita-Boot iha competência para hato'o ba Conselho de Ministros ne'ebá para tau matan ba ida-ne'e ho didi'ak para ema, povo ne'e, bele livre no sente katak ukun an duni e livre ba buat hotu-hotu, labele ema atu hakat de'it bá ATM mós ta'uk hotu *Rama Ambon* ne'e, ema atu hakat de'it bá mercado atu hola modo ruma mós ta'uk *Rama Ambon*, tanba de'it arte marcial sira-nia hahalok. Arte marcial la hanorin hanesan ne'e, mas pessoal ka membro hirak ne'e de vez em quando halo buat ne'ebé ladún di'ak, bolu sira-nia liderança sira para investiga ho di'ak, para bele fó-hanoin, fó educação ba sira-nia membro sira para bele cria estabilidade iha rai laran, selae maka ita ko'alia kona-ba desenvolvimento nacional, juventude sira mak sai ai-riin ba Nação ne'e mak sai filafali saida mak ne'e ita mós la hatene.

Ida-ne'e mak ha'u-nia intervenção, ha'u entrega filafali ba Sr.<sup>a</sup> Presidente do Parlamento.

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, Sr. Deputado.

Tuirmai, Sr. Deputado Marcos Soares Martins.

Se faz favor.

Sr. **Marcos Soares Martins** (CNRT): — Obrigado ba oportunidade.

Respeito ba S. Ex.<sup>a</sup> Presidente do Parlamento Nacional em exercício e composição da Mesa, ba mós S. Ex.<sup>a</sup> Vice-Ministro dos Assuntos Parlamentares, ba distinto no distinta Deputado sira hotu, ba mós mídia ne'ebé hato'o ami-nia lian ba fatin ne'ebé-ne'ebé de'it, bom dia no respeito ba ita hotu.

Aproveita oportunidade ida-ne'e, primeiro, hato'o ha'u-nia apreciação ba atividade pesquisa ne'ebé ohin hato'o.

Ba mós declaração husi KHUNTO, ami aprecia no aceita ho Ita-Boot nia apoio ba merenda escolar no mós promove produto local, ho nune'e, parte ami-nian mós ami recomenda ba Ministério da Educação, karik bele, ami mós hatama produto local, hanesan ai-kulat, iha merenda escolar.

Ha'u mós aproveita oportunidade ne'e atu aprecia ba governação anterior no mós IX Governo, ne'ebé tau nafatin prioridade ba programa reabilitação café iha território ne'ebé café iha. Questão ne'ebé ha'u hakarak foti iha-ne'e, ligado ba reabilitação refere, katak dados ne'ebé apresenta husi implementador sira, hanesan companhia, técnico ne'ebé recruta husi companhia, dados ne'ebé apresenta ba Ministério Agricultura la justo. La justo tanba dados ne'e la tuir realidade. Exemplo, iha livro ne'e ...

*Deputado ne'e hi'it livro bainhira lê, hodi halo referênciá.*

... iha suco rua, ida iha nia quintal 10 ha, maibé realidade 2 ha mós la to'o. Ida tan iha 7 ha, maibé realidade la to'o.

Dados ida mós mai husi direção Casa Civil, ne'ebé ita-nia Sua Excelência Presidente rasik mós cria hela ka facilita apoio ba programa reabilitação, sira-nia pesquisa mós hatete katak iha ona pagamento ba beneficiário balu, ne'ebé selu osan boot maibé realidade café ne'ebé sira halo reabilitação ne'e ki'ik tebes. Problema ida-ne'e ita considera sério, tanba ita hatene katak ne'e *merugikan anggaran negara*. Ho nune'e husu ba Ministério Agricultura atubele halo fiscalização ba autor ka companhia sira-ne'ebé agora daudauk halo hela reabilitação café.

Ikusliu, hakarak repete tan katak estatuto professores contratados ita questiona beibeik, maibé to'o agora ita seidauk rona mudança ne'e bainhira. Ita labele aproveita de'it tempo campanha mak ita

dehan, «imi vota ami, depois ami hadi'a imi-nia estatuto». Ha'u hanoin, ida-ne'e ita mós labele, usa sira sai hanesan ita-nia escada para ita ultrapassa, maibé liu tiha ita nonook.

Obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, Sr. Deputado.

A seguir, distinta Deputada Maria Angelina Sarmento.

Se faz favor.

Sr.<sup>a</sup> **Maria Angelina Lopes Sarmento** (PLP): — Muito obrigada, Sr.<sup>a</sup> Presidente em exercício, bom ida.

Bom dia mós ba membro da Mesa sira, Sr. Vice-Ministro dos Assuntos Parlamentares, distintas e distintos Deputados no povo doben Timor-Leste.

Ha'u secunda relatório fiscalização husi Comissão D nian, ne'ebé questiona e preocupa ho questão divergência ou conflito ka problema entre *Timor Gap* ho *Timor Resources* e recomendação ida husi Comissão D nian pertinente tebes ba Ministério Petróleo atu acerta didi'ak entre companhia *Timor Gap* ho *Timor Resources*, atu buka solução ba sira-nia problema. Ita hotu preocupa ho ita-nia reserva Fundo Petrolífero, enquanto agora iha ona oportunidade ba exploração ita-nia mina-rai iha rai-maran, mas ita iha fali desentendimento ida entre companhia rua, ida companhia estatal ho companhia *Timor Resources*.

Ha'u-nia intervenção ohin hakarak hato'o pergunta ba Sr. Ministro atubele halo encaminhamento ba ministério relevante, liuliu ba instituto público tolu ne'ebé Governo reitera iha ninia Orçamento Retificativo katak extingue, hanesan ANAPMA, ANAS, I.P. ho ANE, I.P.

Instituto público tolu ne'e estabelece husi VIII Governo ninia política, liuhusi decreto-lei sira. Exemplo, ANAPMA ho Decreto-Lei n.º 24/2021, ANAS, I.P. ho Decreto-Lei n.º 29/2020. Iha audiências ha'u hato'o duni pergunta sobre ANAPMA nian e hetan ona resposta husi Vice-Ministro das Finanças, maibé husi ANAS, I.P. ho ANE, I.P. funcionário sira-ne'ebé recrutado, sira-ne'e funcionário ne'ebé iha mérito no iha duni experiência, maibé depois de Governo toma decisão atu extingue, to'o agora sira la iha informação kona-ba sira-nia estatuto ne'e oinsá. E sira rasik, tanba liuhusi decreto-lei mak recruta sira, até à presente data Ministro rasik, neste caso Ministro das Oras Públicas, seidauk halo reunião ida ho sira atu explica katak atu extingue ona sira, sira-nia estatuto ne'e oinsá, transfere hanesan funcionário público hanesan baibain ka? Ou sira-ne'e direito hanesan funcionário ne'e lakon? Ida-ne'e mak sira husu atu ami levanta iha-ne'e para bele hatene didi'ak. ANAPMA iha resposta ba ida-ne'e.

Segundo, ha'u husu atu autoridade local sira bele hatuur sira-nia posição atu regula lala'ok ka regra sira kona-ba husik animal livre iha cidade. Exemplo, hanesan iha Metinaro, foin daudauk iha



fim-de-semana, karau-metan, karau-timur ne'e atravessa ka ultrapassa estrada hadau malu ho transporte sira, iha loos Posto Administrativo Metinaro nia oin ho esquadra PNTL nian. Autoridade local sira, liuliu administrador do município sira, sira-nia papel iha-ne'ebé? Sira tem que regula atu garante estrada pública sira atu animal labele ultrapassa tanba bele causa acidente ba transporte sira. Ne'ebe, ha'u hanoin, ida-ne'e precisa atenção séria husi autoridade local sira atu nune'e sira bele fó andamento ba decreto-lei ka decreto do Governo ne'ebé regula kona-ba lala'ok sira hakiak animal iha uma, atu família sira bele toma atenção ba ida-ne'e.

Terceiro, ha'u mós secunda ho saida mak ohin Deputado António Verdial hato'o kona-ba merenda escolar no mós facilidade ba escola pública sira. Ita ko'alia kona-ba facilidade ba escola pública sira, coitado, triste tebetebes. Iha Díli laran de'it escola sira, ha'u foti exemplo ida escola pública besik ha'u-nia área, hanesan escola *SD (Sekolah Dasar)* Aituri-Laran ne'ebá ne'e, *toilet* ka casa de banho ida maibé bee de'it mós la iha. Ne'e labarik sira la confidente atu bá escola tuir horário ne'ebé iha, se sira iha necessidade ruma atu bá casa de banho, sira labele aguenta no sira tem que halai fila. Ne'ebe Governo, favor ida, toma atenção ba questão sira-ne'e.

Muito obrigada, Sr.<sup>a</sup> Presidente.

Sr.<sup>a</sup> **Presidente** (Maria Terezinha da Silva Viegas): — Muito obrigada, Sr.<sup>a</sup> Deputada

A seguir, distinta Deputada Cedelízia Faria dos Santos.

Se faz favor.

Sr.<sup>a</sup> **Cedelízia Faria dos Santos** (CNRT): — Muito obrigada, Sr.<sup>a</sup> Presidente em exercício.

Ha'u-nia bom dia no respeito ba Ita-Boot, componente da Mesa, Excelência Sr. Vice-Ministro, distinto Deputado sira, audiência, mídia sira, maluk rona-na'in Rádio Parlamento Nacional no povo doben Timor-Leste.

Uluknanain, ha'u hakarak hato'o ha'u-nia apreciação ba relatório husi Comissão rua nian, Comissão F no Comissão D, ne'ebé hala'o ona sira-nia atividade fiscalização, ha'u-nia apreciação ba Ita-Boot sira.

Segundo, ha'u hakarak hato'o mós apreciação no secunda declaração política Bancada KHUNTO nian, ne'ebé tau questão boot kona-ba merenda escolar, ida-ne'e sai preocupação ita-nian hotu.

Terceiro, ha'u mós hakarak hato'o parabéns ba ami-nia Presidente GMPTL ne'ebé, iha semana kotuk, hato'o nia preocupação kona-ba hahalok no lala'ok ne'ebé acontece husi Deputado sira ba ita-nia Deputada sira. Ha'u-nia parabéns no secunda ba saida mak Ita-Boot ko'alia, hanesan Presidente GMPTL, Ita-Boot tem que hanesan ne'e duni. Ita fiar katak ohin loron acontece ba Deputada ida, se ita la tau atenção, Mesa la tau atenção, ba oin sei acontece mós ba Deputado sira seluk. Tanba ne'e mak

ami husu ba Mesa, favor ida tau atenção ba questão sira-ne'ebé acontece, hanesan ita-nia Presidente GMPTL fó-sai ona.

Quarto, ha'u hakarak haree ba relatório husi comissão rua nian, ha'u husu ba Governo, liuliu ba Ministério da Saúde, atu haree questão ne'ebé relata iha relatório Comissão F nian, ponto 8, ne'ebé hatete katak «SAMES to'o agora seidauk registado iha sistema hanesan importador maski halo ona atividade importação produto farmácia nian». Ne'ebe questão ida-ne'e crucial tebes, Excelência Vice, se bele karik IX Governo haree to'ok questão ida-ne'e. Se seidauk iha nia legalidade, favor ida tau hela esforço ida para ita legaliza tiha. Tanba IX Governo comprometido ona dehan atu tau sasán hotu-hotu ho loloos, então ami husu ba Ita-Boot sira mós bele haree filafali questão ida-ne'e. Se bele legaliza tiha lailais, di'ak liu tan.

Tuirfalimai, ha'u hakarak ko'alia mós kona-ba informação ne'ebé ha'u simu husi Laboratório Nacional, liuliu husi Direção Tuberculoso nian. Sira hatete katak Comissão F, bainhira hala'o fiscalização, la halo ba sira-nia fatin. Sira iha preocupação barak tanba sira usa medicamento ou sira-nia laboratório ne'e sira iha sasán barak iha-ne'ebá mak sira usa iha risco mós ba ita-nia enfermeiro ou pessoal sira-ne'ebé serbisu iha laboratório Tuberculoso nian. Sira mós la iha gerador, bainhira ahi mate, sai preocupação tebes ba sira, sira-nia geleira ne'e la funciona ho didi'ak. Ita-Boot hatene, serbisu iha área tuberculoso ne'e risco mós ba sira-nia saúde. Horibainhira sira husu dehan, Comissão F, se bele, halo mós fiscalização ba iha-ne'ebá, maibé tempo mak la to'o, ha'u husu bá Governo atu tau atenção bá assunto ida-ne'e.

Ikusliu, ha'u hakarak husu hela ba Ministério de Telecomunicações, liuliu ita-nia Ministro Miguel Manetelu, halo favor ida tau hela atenção ba companhia oferecedor torre sira-ne'e, liuliu *TELKOMCEL*, torre sira-ne'ebé sira instala ne'e besik tebetebes povo ka população sira-nia uma, distância ne'e ita bele dehan 3 m até 5 m de'it. População sira questiona tebetebes tanba ninia altura ne'e aas tebetebes, bainhira anin boot, sira ta'uk katak torre ne'e bele monu mai hanehan sira-nia uma.

Sira mós dehan katak iha radar, tuir saúde sira hatete, se besik liu ninia radar ne'e ladún di'ak ba sira-nia saúde. Iha área Taibesi ho Aituri-Laran ne'ebá distância husi torre ida ba torre ida ne'e la dook ida, então ida-ne'e perigo tebetebes, Sua Excelência Vice-Ministro, ami husu favor ida, Ita-Boot sira tau hela questão ba ida-ne'e.

Ikusliu – ohin ikusliu tiha ona maibé ida-ne'e maka ikus liu – kona-ba osan ida-ne'ebé coloca ba merenda escolar, 42 centavos ne'e, ohin distinto Deputado dehan «ida-ne'e mak inclui ona osan ba ema nia salário, *biaya* transporte, *biaya gaji*, *biaya* ida-ne'e», ha'u hanoin, ida-ne'e uitoan tebes. Se 42 centavos de'it mak nia tem que fahe tan uitoan ba salário, tau tan uitoan ba osan transporte, ida-ne'e nia sai tia fali osan ba estudante ida bele hetan de'it 10 cêntimos. Ne'ebe ami husu favor ida, questão ida-ne'e mós tem que haree, osan ne'ebé aloca ba estudante sira.

Muito obrigada.

Sr.<sup>a</sup> **Presidente** (Maria Terezinha da Silva Viegas): — Muito obrigada, Sr.<sup>a</sup> Deputada.

A seguir, Deputado Armando Lopes.

Sr. **Armando dos Santos Lopes** (PD): — Di'ak, obrigado ba tempo.

Sr.<sup>a</sup> Presidente Parlamento em exercício, composição da Mesa, ne'ebé ha'u respeita, e ha'u-nia respeito mós ba Sr. Vice-Ministro dos Assuntos Parlamentares no ba distinto no distinta Deputada sira, bom dia.

Sexta-feira liubá ha'u iha Município Lautém, povo Município Lautém, la'ós hotu maibé balu ne'ebé ha'u hasoru, hameno questão rua ho proposta ida.

Questão primeira mak agora tempo atu fila rai, rai iha sira-nia to'os, tanba udan mós agora besik daudauk ona, sira prepara ona fini atu kuda, hanesan batar ho seluk-seluk tan, mas neste momento trator ne'ebé existe iha Município Lautém, uluk ne'e iha 41, maibé to'o agora hela de'it 18. Quarenta e um ne'e la'ós dehan katak aat hotu, maibé ne'e precisa manutenção. Agora, 18 ne'e povo mak tau mina e manutenção mós povo ka agricultor sira mak fó osan atu halo manutenção, tan ida-ne'e mak durante ne'e operacionalmente 18 de'it mak la'o. Ho ida-ne'e mak, tanba Orçamento Retificativo ne'e aprovado, povo sira, liuliu agricultor sira, husu tanba sira somente hetan osan atu sustenta sira-nia oan sira-nia estudo liuhusi dalan ida-ne'e de'it. Tan ida-ne'e mak sira husu katak carreta Estado iha manutenção bele la'o di'ak, maibé carreta povo nian ka trator ne'e nu'usá mak manutenção povo mak diretamente buka osan ba manutenção. Ba mina, sira pronto tau, maibé pelo menos manutenção ne'e Governo tau-matan tanba Orçamento Retificativo foin daudauk aprova ona.

Além de ida-ne'e, uma escola lima ne'ebé foin daudauk hetan estrago husi anin no udan boot iha fulan-maio no fulan-julho liubá, técnico destacado husi Ministério da Educação halo ona levantamento dados atu, provisoriamente, bele lori zinco, ai no prego balu atu halo reconstrução provisória ida. Maibé, to'o a data seidauk, tan ida-ne'e mak besik ona exame e atividade escola mós la la'o, merenda escolar mós, oinsá mak atubele usa ho tempo ne'ebé agora la'o daudauk ne'e.

Ho ida-ne'e mak sira husu atu, liuhosi ha'u e ha'u encaminha ba Sua Excelência Vice-Ministro, bele hato'o ba ministério relevante hodi haree assunto ida-ne'e ho tempo ida-ne'ebé badak tanba sira mós dehan katak Orçamento Retificativo aprovado.

Além de questão rua ne'e, iha mós proposta ida. Sira dehan katak se possível, estrada ida-ne'ebé husi Posto Lautém to'o iha capital Município Lautém bele tau iha Programa IX Governo, iha 2024 ne'e, ho carácter urgente tanba durante ne'e ida-ne'e problema boot ne'ebé acontece. Sira mós dehan katak Governo atual ne'e hatene nia problema tanba saida mak acontece iha 2016, iha tempo cerimónia 28 de Novembro, ne'ebe sira dehan, Governo atual mós hatene nia problema ne'e iha altura ne'ebá.

Além de ida-ne'e, ha'u mós aprecia tebes Bancada KHUNTO ne'ebé ohin apresenta kona-ba merenda escolar. Loos katak merenda escolar uluk ne'e ita bele dehan katak 25 centavos e agora daudauk ne'e iha 42 centavos, quando ita halo comparação, menu ne'ebé uluk ho 25 centavos ne'e sei di'ak do que agora ho 42 centavos ne'e. Ne'e la'ós questão buat seluk, maibé tanba burocracia mak boot tebes, tanba osan 42 centavos ne'e la'ós grupo mak kaer e la'ós escola mak kaer, maibé ida-ne'e atu sosa sasán ne'e fó fali ba companhia.

Quando companhia mak kaer, companhia mós tem que conta lucro hira mak nia tem que hetan tanba ne'e companhia. Agora, uluk ne'e diretamente entrega ba escola, diretiva escola mak, hamutuk ho grupo, hatene oinsá atubele prepara menu sira-ne'e para fó ba nia oan sira. Mas, se ba fali companhia, ne'e oin seluk ona. Quando iha osan ruma ne'ebé iha resto, sira usa osan ida-ne'e hodi bele trata assunto seluk ne'ebé iha relação ho merenda escolar. Maibé agora daudauk ne'e osan resto ne'e *justru* administração município sosa fali carreta rua tolu, ida-ne'e mak causa. Ida-ne'e mak professor sira mós tau questão durante ne'e.

Obrigado.

Sr.<sup>a</sup> **Presidente** (Maria Terezinha da Silva Viegas): — Obrigada, distinto Deputado.

A seguir, distinta Deputada Veneranda Lemos.

Se faz favor.

Sr.<sup>a</sup> **Veneranda Lemos Martins** (CNRT): — Obrigada ba oportunidade, Sr.<sup>a</sup> Presidente do Parlamento em exercício.

Dadeer di'ak ba Ita-Boot no composição Mesa, ba colegas distintos Deputados hotu, ba Sua Excelência Sr. Vice-Ministro dos Assuntos Parlamentares, mídia no audiência tomak.

Ha'u-nia intervenção ida-ne'e ha'u husu liu atenção ba Governo, liuliu ba Sr. Vice-Ministro ne'ebé acompanha Plenária ida-ne'e, ha'u foti questão ida kona-ba assunto CLN (Centro de Logística Nacional) ninian ne'e ba dala tolu ona, ha'u nunca hetan resposta.

Primeiro mak CLN, iha assunto ida que ha'u foti iha 2022, aluga camioneta hamutuk 30 ne'ebé tula produto local ba projeto Cesta Básica ninian ba Município Baucau, iha Posto Administrativo Quelicai no Baguia, camioneta ida-ne'e seidauk selu.

Segundo, iha mós pessoal sira-ne'ebé CLN contrata, hamutuk ema na'in-ualu, iha Tekinomata, Laga, questão ne'e mós ha'u foti dala tolu ka dala haat ona, mas ha'u nunca hetan resposta husi Governo.

Terceiro, ha'u mós hakarak husu Governo atu halo acompanhamento iha mercado kona-ba sasán ka folin foos ninian, preço ne'ebé até à data la estável. Depois de Governo hatún tiha taxa

importação ninian, nafatin iha loja sira-ne'e preços la estável, bele dehan, loron ida loron rua preço ne'e sa'e hela de'it.

Quarto, assunto ambiente ninian, lixo ne'ebé soe namkari nafatin iha Díli laran, cidade, se ita la'o tama ba bairros, ne'e ita la precisa ko'alia tanba ne'e pior liu.

Ha'u bele fó de'it exemplo ki'ik ida, iha valetas ne'ebé comunidade rasik halo lixo fatin iha valeta sira sorisorin, ema sira husi bairro sira seluk mai soe fo'er hotu iha fatin ida de'it, sira bele tula lixo dook husi fatin mai enche filafali de'it iha valeta ko'ak sira-ne'e e agora ita la hatene valeta koak sira-ne'e comunidade mak atu hamoos ka, Governo mak atu tau atenção ka, Município Díli mak atu tau atenção ka, ita triste tebetebes haree questão sira hanesan ne'e.

Ne'ebe, husu tebetebes ba Governo, Governo ne'e sei foun hela, jovem mak nakonu, jovem mak barak iha-ne'ebá, ha'u fiar katak hotu-hotu iha *semangat baru* atu serbisu, ne'ebe assunto sira hanesan ne'e, favor ida ita haree ho didi'ak tanba ita lakohi atu ita-nia comunidade moris hanesan iha Tibar, ne'ebé lixo ne'e boot ba beibeik, ema sunu loron-loron. Bainhira ita liu iha Tibar, ita hanoin katak iha Tibar ne'e mós iha abu-abu taka rai, mas afinal la'ós, lixo ne'ebé ema sunu ne'e mak taka hotu filafali ema nia uma, até comunidade sira terus, liuliu labarik ki'ikoan sira, sofre ba saúde respiratória ninian. Ne'ebe, husu ba Governo atubele tau atenção ba questão hirak-ne'e atu ita-nia cidade, pelo menos, bele moos uitoan ba, ita sente ba ne'e dehan moos uitoan. Regra ida ba camioneta sira ne'ebé mai tula lixo loroloron, regra ne'e haree filafali atu sira mós tula lixo ne'e ho di'ak netik, selae tula iha camioneta nakonu, la taka metin, lixo ne'e fakar filafali de'it iha estrada sira.

Husu nafatin atu Governo, ha'u hakarak atu encoraja nafatin, atu serbisu nafatin ba oin hodi fó atendimento di'ak ba ita-nia comunidade.

Muito obrigada.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinta Deputada.

A seguir, distinto Deputado David Mandati.

Sr. **David Dias Ximenes** «Mandati» (FRETILIN): — Obrigado ba Sr.<sup>a</sup> Presidente interina, maluk Deputado sira hotu.

Ha'u iha ponto balu iha-ne'e atu hato'o, primeiro mak paragem microlete sira-nian. Pelo menos ita halo tuir lai uluk Indonésia sira halo iha-ne'e, numera, bá pára iha-ne'ebá no ho tempo minuto hira porque agora daudauk ne'e ita la'o, às vezes, sira atu hetan passageiro, atravessa, e perigo.

E depois, ida mak ita-nia polícia sira ho ita-nia transporte, loloos tem que averigua, iha microlete laran ne'e tem que em na'in-hira porque selae, coitado, ema sira sa'e microlete ne'e hanesan fali sardinha enlatada. Ne'e ladún di'ak.

La'ós de'it ida-ne'e, ita-nia autocarro sira ne'ebé halo transporte entre cidades e vilas, ida-ne'e mós, bele karik, controla tanba quando sai tiha ona husi Díli, passageiros sira até balu bá sa'e tiha fali iha kapón leten, depois monu, condutor mak sala. Se condutor hakarak tau ordem, sira depois tuda. Ne'ebe, se bele karik, haree mós ida-ne'e.

E depois, uluk ha'u ko'alia tiha ona iha-ne'e, kona-ba reduções de estações de combustível na cidade de Díli. Estações de combustível ne'e besibesik malu los, bele karik, haree buat ne'e! Ita hein katak labele acontece buat ruma, se acontece, ita iha Díli laran la salva ida mak ne'e.

Ho mós buat ida *Pertamina* iha Praia das Coqueiros ne'ebá, bele karik, começa hanoin ona para muda. La'ós dehan ita lakohi *Pertamina* iha-ne'e, maibé ita tem que começa ko'alia mós ba ita-nia segurança, ba ita-nia cidade.

Ida mós ita ko'alia iha-ne'e kona-ba, ha'u seidauk rona tan fali, evolução da ratificação das pessoas que perde, procura das pessoas desaparecidas, kona-ba ita-nia ema sira be lakon iha funu laran, oinsá atu halo ratificação kona-ba convenção ida-ne'e, oinsá, porque ita tem que hanoin mós ita-nia ema sira-ne'e. Neste caso, eles não podem desaparecer meramente desta forma. Sira-ne'e la'ós dehan ita tau iha-ne'e dehan à procura, atu buka ema sira ne'ebé lakon, sira-ne'e la'ós lakon de'it, ita hatene sé-sé mak lori. Sempre kalan-kalan, ita bele dehan iha-ne'e, kalan mak ema mai lori sai sira iha sira-nia inan aman sira-nia oin, ou então feen ho oan sira-nia oin.

Balu fali ema captura, lori tun mai, depois da última queda da base de apoio iha setenta e nove, ema sira-ne'e balu moras be tun mai, mesmo ho Soeharto nia amnistia, sira sempre lori lakon, ne'e mak uluk ita dehan *pembersihan* iha 1979.

Balu fali kalan mak sira lori, e depois de acontecimento de 10 de julho 1980, kalan-kalan ema lori sai, ne'e mós ohin loron ita seidauk hetan.

Balu fali iha 1983, ne'e mós ema lori sai. Depois, vítima de 12 de novembro, ohin loron ita seidauk hatene resto mortal sira-ne'e iha-ne'ebé. Depois, 1978 e 1979. Restos mortais David Daitula nian ho Ran Kadalak nian.

Ita bele dehan naran balu iha-ne'e. La'ós acusa, uluk kedas ha'u dehan katak ha'u la iha interesse político, ita halo política ba ita-nia mate sira ne'e labele! Maibé, ita mós tem que iha preocupação katak sira mós merece atu hakoi di'ak. Sira-nia oan sira, sira-nia inan aman hein oinsá mak ita bele trata sira.

Por exemplo, camarada Presidente Nicolau Lobato ninian, ita bele ko'alia ho Yunus Sofian, uluk 744 nia comandante. Depois, Sr. Prabowo, sei iha hela, ita ko'alia didi'ak ho sira. Loron ruma mak sira-ne'e mate hotu, ita sei la hetan ita-nia maluk sira.

Ida tan fali, hanesan limpeza de 1979, uluk senhor ida naran capitão Mudi, capitão Mudi, nia mak substitui ka troca fali Sr. Prabowo. Quando nia sai husi diretor *Kopasus* (*Komando Pasukan*

*Khusus*) nian, capitão Mudi ne'e mak sai fali general ona be nia mak troca, nia mós keta halo sei moris, husu to'ok mak nia.

Iha 1980 nian, 10 de junho ninian, Sr. Ali Musa, Sr. Subagio H. S., sei moris hotu. Iha 1983 nian Wiliam da Costa, nia mak momento ne'ebá Kasi 1 (*Kepala Seksi 1*). Iha 1981 *Danrem* (*Komandan Resimen*) na altura sé. Iha 1998 ho 1999, Tono Suratman, balu sei moris, ita tem que aproveita sira. La'ós atu acusa sira, la'ós! Ita atu ko'alia ho sira, ohin loron ita fó di'ak malu, bele karik ita bele aproveita ko'alia ho sira.

Muito obrigado, Presidente.

Sr.<sup>a</sup> **Presidente** (Maria Terezinha Viegas: — Muito obrigada, Sr. Deputado.

A seguir, distinto Deputado José Virgílio.

Faz favor.

Sr. **José Virgílio R. Ferreira** (CNRT): — Obrigado ba tempo.

Ha'u-nia respeito ba Presidente em exercício no componente da Mesa, distintos e distintas Deputados, Sr. Vice-Ministro dos Assuntos Parlamentares no povo rona-na'in sira.

Tuirmai, ha'u hakarak aprecia tebes relatório husi comissão rua, comissão D ho Comissão F. Ita haree katak Comissão D nia relatório ne'e pertinente tebes, e Sr. Ministro hatene kedas katak relatório ne'ebé Comissão D hato'o ne'e, visita ne'e ba kedas iha município tolu, fatin ne'ebé *Timor Resource* ho *Timor Gap* hala'o hela perfuração sira-ne'e. Precisa reforça tan de'it, relatório ne'ebé hato'o ne'e tem que hato'o ba Governo para reforça tan, hodi haree perfuração gás ne'e bele la'o ona.

Tuirmai, ha'u hakarak hato'o assunto balu liga ba visita bá Município Viqueque. Hatutan de'it Deputado Anacleto nian kona-ba estrada, atu fó-hanoin de'it ba Governo, tanba ohin Deputado foti ona, dehan nia rona entrega filafali ba companhia ida-ne'ebé *black list* tiha ona iha VIII Governo, maibé precisa mós haree didi'ak tanba sá mak IX Governo bolu filafali companhia ne'e, parece haree questão kona-ba buat ida regras *Covid* nian iha momento ne'ebá, companhia labele hala'o to'o remata. Ne'e hakarak fó-hanoin de'it.

Tuirmai, liga mós ba Viqueque tan, ita haree katak iha Lugatoi, estrada ida-ne'ebá, ita haree ba rai ne'e monu hela de'it, ne'ebe sugere para oinsá Governo tem que haree ona estrada ida-ne'ebá tanba aterro tiha, depois camioneta boboot mak liu iha-ne'ebá, la'ós carreta passageiros no carreta ki'ik sira liu, maibé carreta camioneta boot, ida roda sanulu ba leten ne'e mak liu no tula rai-henek todan hodi bá aterro estrada sira seluk. Maibé, companhia mós aterro nafatin tanba nia mós kaer hela obra iha estrada liga ba Loihunu ho Ossu nian.

Depois, ita haree katak iha-ne'ebá, iha hospital antigo ne'e, liga ba Ministério Saúde nian no liga mós ba Obras Públicas, oinsá atu haree to'ok, ita hateke ba iha hospital tuan ne'e rai ne'e começa monu ona, hela pedasuk de'it para hospital ne'e atu afetado husi inundação.

Tuirmai, liga ba irrigação iha Vemasse, ha'u liu bá iha-ne'ebá, iha Cairabela ne'e iha natar ida iha-ne'e, mas nia só tempo udan de'it mak sira bele halai. Ita hotu liu iha-ne'ebá, ita hotu haree, iha parte Cairabela, sira halo fatin be tunu ikan ba ne'e, ha'u husu comunidade sira, comunidade sira dehan, só tempo udan de'it mak sira halai natar, ne'ebe sira husu katak irrigação ida-ne'ebé Vemasse nian, se bele, liga to'o ba iha fatin ida-ne'ebá para sira bele halai natar tinan ida tem que dala rua ou dala tolu. Se halai dala ida de'it, sira depende ba iha tempo udan.

Ha'u hanoin, mak ne'e de'it ona, Sr. Vice-Ministro, Presidente em exercício.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

A seguir, distinto Deputado Natalino do Nascimento.

Faz favor.

Sr. **Natalino dos Santos Nascimento** (CNRT: — Obrigado, Sr.<sup>a</sup> Presidente.

Bom dia, Sr.<sup>a</sup> Presidente, composição da Mesa, Sr. Vice-Ministro dos Assuntos Parlamentares, colegas Deputados e rona-na'in povo doben Timor-Leste.

Iha-ne'e, ha'u atu foti questão ida kona-ba preocupação husi ita-nia PNTL sira.

Ita sempre questiona kona-ba segurança, atuação polícia nian, maibé preocupação Polícia Nacional Timor-Leste iha distrito balu, liuliu, quando sira halo atuação no halo «capturação», automaticamente sira lori bá ministério público atu halo processo, tanba ministério público mak na'in ba processo crime. Maibé, lamenta tebetebes, wainhira sira halo «capturação», lori bá ministério público, ministério público dehan katak sira iha tempo recesso, e caso ne'e emergência e precisa atu halo processo, ministério público orienta filafali polícia sira atu halo processo normal. Tanba ne'e ha'u foti iha-ne'e, e husu Sr. Vice Ministro atu encaminha informação ne'e atu haree, porque iha fulan-agosto ne'e iha férias judiciais. Férias judiciais ne'e nia implicação mak ba serviço iha tribunais no ministério público, tanba ne'e polícia sira lamenta tebetebes, e sira halo atuação, halo «capturação», iha crime balu flagrante delito, maibé, quando to'o iha ministério público, ministério público dehan katak halo de'it tuir processo normal tanba iha ministério público distrital iha de'it ema ida ou rua de'it.

Nune'e mós iha tribunal distrital, iha juiz ida ou rua de'it, ida-ne'e mak sira lamenta tebetebes. Ha'u husu ba Governo atu haree questão ne'e, karik iha reforma judiciária, e, haree mós kona-ba férias judiciais ne'e ita opta sistema Portugal nian, atu iha férias judiciais ne'e serviço tribunais nian labele impede, husu atu halo recrutamento ba juiz e procurador sira, hodi nune'e iha tempo recesso



sira-nian bele preenche vagas iha no juiz iha tribunal sira atubele halo serviço. Tanba polícia sira dehan, «se hanesan ne'e, ami lori bá, flagrante delito, sira husik no liberta tiha ou halo processo normal, ida-ne'e nia implicação, crime sira sei halo nafatin. Sira dehan, “*paling* ita bá, haruka ita filafali”». Tanba ne'e ha'u foti questão iha-ne'e, ha'u atu husu ba Ministério da Justiça atu haree oinsá, política atu halo recrutamento ba juiz ho procurador timoroan sira para aumenta.

Segundo, ha'u foti questão iha-ne'e atu husu ba Ministério da Justiça atu haree kona-ba *aset pribadi* ou bens ne'ebé Estado Indonésia nian ou ema Indonésia ne'ebé husik hela.

Ha'u foti exemplo, iha parte Surikmas, iha-ne'ebá ema começa halo andar. Será que sira hetan licença husi Governo? Ha'u hakarak foti questão ne'e porque ne'e atu fó receitas. Ita ko'alia receitas, ne'e parte receitas ba Estado, então husu Ministério da Justiça atu regulariza ona no atu identifica sasán Estado nian para depois bele contribui ba receitas. Ha'u foti questão ne'e dala rua ona.

Terceiro, ha'u aprecia tebes Chega!, maibé hakarak atu harii centro, sítios, ka harii centro arquivo histórico iha arreadores antigo Comarca Balide, halo ha'u confusão. Se ita atu preserva fatin histórico, agora atu harii fali buat foun iha Comarca Balide, ha'u haree, Sr. Hugo Fernandes conhece fatin ida Comarca Balide ne'e saida, fatin ne'e precisa atu halo preservação histórica. Agora, se bá tau fali *gedung* foun boot ida iha-ne'ebá, historia ne'e inventado tiha ona, tanba ne'e ha'u la aceita, husu atu haree filafali. Se hakarak halo fatin seluk, bele halo, maibé Comarca Balide fatin único ne'ebé sei preserva hela, Governo sei assegura hela mak Comarca Balide.

Fatin histórico sira seluk, hanesan SGI nian ne'e, loloos preserva, mas agora ema hela fali tiha ona. Fatin detenção, ema barak mate iha SGI Colmera ne'ebá. Fatin Kotis, ne'e fatin detenção, herói barak mate iha-ne'ebá, mas ohin loron destrói hotu tiha ona.

Shang thai Ho, fatin ne'ebé uluk ita sei ki'ik iha ai-laran mós ita rona hela, dehan, Santai Ho ne'e mak ne'e mak fatin kaer membro Comité Central sira, comandante boboot sira bá castigo iha-ne'ebá, preso político iha-ne'ebá, mas sira-nia fatin ne'e destruído tiha. Ita atu preserva mas destrói barak tiha ona, agora atu halo destruição filafali ba ida Comarca Balide, atu harii fali centro foun ida iha-ne'ebá? Tanba ne'e husu atubele tau atenção, Sr. Vice-Ministro, atu hato'o ba Sr. Hugo Fernandes atu haree filafali ne'e, atu *review* filafali ninia programa ne'e. Ha'u aprecia sira-nia serbisu, maibé lamenta, quando dehan atu preserva sítio histórico, ita bá hari fali história foun iha-ne'ebá. Ne'e ha'u la concorda.

Ha'u sente, ida-ne'e de'it mak ha'u foti iha-ne'e, e obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, Sr. Deputado.

Iha ponto de ordem balu iha-ne'e ne'ebé que registado, maibé molok atu fó ponto de ordem, ha'u conclui tiha lai intervenção.

Última intervenção, Sr.<sup>a</sup> Deputada Sancha Tilman.

Faz favor.

Sr.<sup>a</sup> **Sancha Margarida Tilman** (PD): — Di'ak, obrigada.

Bom dia ba Presidente Parlamento Nacional em exercício ho componente Mesa, Excelência Vice-Ministro dos Assuntos Parlamentares, distintas e distintos Deputados, maluk rona-na'in sira no povo Timor-Leste.

Primeiro, relativamente ho relatório, aprecia tebes relatório fiscalização husi Comissão F ho Comissão D nian.

Kona-ba Comissão F nian, secunda ho apreciação husi Deputado balu, Deputado Gabriel.

Kona-ba Comissão D nian, iha comentário uitoan ita liga filafali ba conclusão n.º 3, ponto 1 ho ponto 4, ne'ebé ko'alia kona-ba Ministro do Petróleo e Recursos Mineiras ne'ebé promete ona atu resolve problema ne'ebé sira hasoru iha sira-nia ministério laran, iha tempo badak. Nune'e, husu ba Governo, husu ba Ministro, atubele realiza duni promessa ne'ebé iha, ne'ebé tau iha conclusão husi Comissão D nian, atu nune'e, molok tama ba discussão ka debate OGE 2024 nian, hanesan ohin sira-nia recomendação ne'ebé husu ba Deputado sira, ita hotu iha Parlamento ne'e, bele haree no apoia orçamento ne'ebé mai husi ministério. Nune'e, dala ida tan husu ba Ministro atu compromisso ne'ebé nia fó bele realiza duni, atubele resolve problema ne'ebé mosu iha sira-nia ministério laran.

Segundo, liga ba intervenção kona-ba lixo iha Díli laran, husu ba Vice-Ministro dos Assuntos Parlamentares atubele transmite ka fó informação ba parte competente atubele gere sira-nia tempo hodi bele hamoos lixo iha Díli laran tanba dala barak ona, antes tempo de serbisu, ita liu bá mai, movimento transporte liu bá mai, ita haree lixo iha Díli laran ne'e nakonu tebes. Liuliu iha Defesa e Segurança nia oin, Aitarak-Laran, Presidente RDTL nia oin, no iha tesik ba edifício Primeiro-Ministro nia oin, nakonu iha lixo ne'ebé naklekar, hanesan plástico, *aqua* fatin sira-ne'e ka cigarro rohan sira-ne'e, ida-ne'e nakonu iha estrada laran. Nune'e husu ba parte competente atubele gere sira-nia tempo didi'ak para hamoos lixo sira-ne'e molok iha movimentação serbisu nian. Ida-ne'e tanba bele mós hatudu imagem la di'ak ba ita-nia *visitor* sira-ne'ebé mai visita ita-nia Rai.

Husi lixo sira-ne'e rasik bele fó mós parte ida ne'ebé bele contribui, bele fó moras ba ema, ita hotu. Nune'e, dala ida tan, husu ba ministério competente atubele toma atenção ba intervenção ne'ebé ha'u foti.

Obrigada barak.

Sr.<sup>a</sup> **Presidente** (Maria Terezinha da Silva Viegas): — Muito obrigada, Sr.<sup>a</sup> Deputada.

Última, desculpa, distinta Deputada Olinda Guterres.

Sr.<sup>a</sup> **Olinda Guterres** (KHUNTO): — Bom dia ba Sr.<sup>a</sup> Presidente em exercício, colegas Deputadas, Secretária da Mesa, Srs. Vices, Sr. Vice-Ministro dos Assuntos Parlamentares no maluk rona-na'in sira, ba Ita-Boot sira tomak.

Sr.<sup>a</sup> Presidente, iha-ne'e ha'u prepara hela intervenção ruma atu hato'o ba, maibé ida ne'ebé ha'u hakerek mak na'in-rua, quase na'in-tolu, ko'alia hotu ona, ne'ebe ha'u labele saida tan. Kona-ba estrada liga Ossu ba Viqueque ninian mós foti tiha ona, kona-ba *zebra cross* mós foti tiha ona, ne'ebe ha'u labele repete tan para hamenus tempo.

Ha'u só fó-hatene tan de'it, agradece, ha'u fó ha'u-nia agradecimento boot tebetebes ba Dona Aliança no mós colega balu ne'ebé, rona ho tilun, fó apoio ha'u. Maibé, ha'u só atu hateten de'it hanesan ne'e: ita iha-ne'e, iha Parlamento ida-ne'e, partido lima mak iha-ne'e, ne'ebe buat política ne'e dinâmica, ohin ida, aban oin ida, tinan lima mai ida. Maibé, tanba de'it política ida-ne'e mak ha'u na'in harii partido rua, ida mak PDC, la fó ha'u-nia fatin mak ha'u halai, ha'u harii rasik mak ida agora.

Maibé, iha linguagem ida ne'ebé la di'ak mai ha'u, ha'u agradece tebetebes ba colega sira-ne'ebé fó apoio ha'u, Deputado sira balu, ida hateten ha'u porcaria, ida hateten ha'u malcriada, mas, desde ha'u-nia vida ne'e iha ha'u-nia uma laran seidauk fó liafuan ida-ne'e. Maibé, la iha buat ida, política mak hanesan ne'e, ne'ebe ha'u só fó de'it ha'u-nia agradecimento ba colega sira-ne'ebé iha sentimento mai ha'u nu'udar inan ida. La'ós inan próprio ba Ita-Boot sira, maibé ho idade ne'e ha'u ne'e inan. Iha-ne'e idade ho ha'u ne'e ha'u kala la hatene, ha'u agora ba 74, ne'ebe ha'u sente ha'u-nia an moe uitoan, mas la iha buat ida. Liafuan sira-ne'e, ha'u tau iha ha'u-nia bolso, ha'u la'o mós la'o ho, ha'u toba mós toba ho, ha'u labele haluha liafuan ida-ne'e.

CNRT, quando halo sala buat ruma iha-ne'e mak ha'u hamriik bá ko'alia, seidauk fó liafuan ida ne'ebé hateten ha'u katak malcriada. Mana Bendita, Ita-Boot sira hotu, seidauk hateten ha'u dehan katak malcriada, seidauk hateten porcaria, seidauk ida. Maibé, coitado, ha'u ho ha'u-nia labarik sira, ha'u-nia ema, Luís ho tan mana, ami la'o tuituir malu hela, e ha'u hasee kedas, «liafuan ida-ne'e ba sé?». Mas la iha buat ida, política mak hanesan ne'e, ha'u só agradece de'it.

Ne'e primeiro.

Segundo, ha'u mós fó obrigado barak, agradecimento barak, ba colega sira-ne'ebé fó apoio ba ami-nia declaração política iha dadeer ida-ne'e. Ha'u fó ha'u-nia agradecimento e louva tebetebes, ami-nia Chefe ne'e mós halo e ha'u-nia Vice ne'e mós bele halo, declaração ida ne'ebé ha'u nem hatene mós, lê iha-ne'e ha'u mós hakfodak, muito bem, capaz tebetebes, monu ba povo nia laran.

Dala ida tan, liafuan todan sira-ne'e ha'u tau ha'u-nia bolso, ha'u la'o ho, tinan lima mai ha'u sei ko'alia, tinan sanulu mós, ha'u mate mak ha'u bele haluha.

Obrigada ba Sr.<sup>a</sup> Presidente.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinta Deputada. Ha'u fó ponto de ordem ba distinto Deputado Antoninho Sarmento. Faz favor.

Sr. **Antoninho Doutel Sarmento** (FRETILIN): — Obrigado.

Apenas atu informa de'it, comunidade balu nia SMS mai iha-ne'e, ne'e mak ha'u foti ponto de ordem atu alerta sira-nia hanoin.

Sira, comunidade husi Lahane Ocidental, husu ba Município Díli ho Proteção Civil, autoridade sira, atu tau atenção ba ai sira-ne'ebé aas iha dalan ninin, ne'ebé ninia sanak começa haliis mai estrada sira-ne'e e perigo boot iha anin boot ida hanesan daudaun ne'e. Liuliu estrada sira iha Hali-Laran e depois iha *lampu merah* Balide nian ne'e ne'e ai sira quase sanak boot iha-ne'ebá, risco boot ba ema la'o ain ho mós ita-nia transporte público sira-ne'ebé liu.

Depois, sira husu ida mak atu atende iha-ne'ebá, parte Aldeia Vale Lahane, Suco Lahane Oriental, comunidade barak la iha acesso ba bee moos tanba ema fura ilegal no SAS (Serviço de Água e Sanemaneto) la controla maka'as, mesmo que hasoru ona responsável BTL, E.P. nian. Tanba ne'e husu atenção, aproveita Vice-Ministro iha-ne'e, atubele alerta mós ba autoridade sira.

Ba atenção, obrigado.

Sr.<sup>a</sup> **Presidente** (Maria Terezinha da Silva Viegas): — Obrigada, distinto Deputado.

A seguir, distinto Deputado Dário Madeira.

Faz favor.

Sr. **Dário Madeira** (FRETILIN): — Obrigado ba Presidente.

Ha'u ko'alia lailais de'it.

Ha'u secunda tebetebes intervenção ida ohin Deputado Anacleto nian ko'alia kona-ba Viqueque liga ba estrada. Ha'u, loloos, la foti ponto de ordem, como Deputado Virgílio foti fali hanesan defensor ba companhia ne'e, ha'u la concorda. Companhia ne'e, hanesan ohin declaração Deputado Anacleto nian ne'e, la'ós primeira vez, la'ós foin tinan lima, tinan neen, ha'u seidauk sai Deputado ne'e nia serbisu tiha ona iha fatin ne'e. E la'ós ha'u de'it mak hatene, Deputado hotu-hotu iha Parlamento Nacional ne'ebé visita ona Viqueque ne'e hatene estrada iha uitoan ne'e. Se la sala, iha 2019 ne'e halo tiha lançamento boot ida iha Aselaitula, kona-ba osan empréstimo halo estrada troço Baucau, Viqueque ba Venilale, Venilale, liuliu ba ponte Aselaitula ba Viqueque.

Agora, ha'u-nia pergunta mak ne'e: tanba saida mak companhia local ne'e, iha fatin uitoan ne'e, quase 7 km, impede ne'e? Ne'e provoca emoção comunidade ninian. E, ne'e la'ós declaração mamuk, sexta liubá, ita hahú debate la'o daudauk ne'e, comunidade halo tiha ona conferência de imprensa iha

parte Ossu nian, husu Governo labele autoriza companhia ne'e atu continua nia serbisu, tanba nia hahú halo movimento. Tanba ne'e ha'u husu Deputado ne'e labele politiza desenvolvimento ba povo ne'e, husik comunidade bele goza desenvolvimento ne'e! Osan empréstimo ne'e Viqueque iha direito atu goza, tanba ne'e husu companhia internacional tem que halo hotu ona estrada ne'e, finaliza ona estrada ne'e. Ha'u fiar, ida-ne'e mak fó nia mós nia sei la bele halo iha fulan neen nia laran, nia tem que han tan tinan lima oin mai mós nia sei la bele halo hotu. Ministro sira tun bá mak nia foin lori *exca* ida iha ne'e halai tun sa'e, quando la iha, nia hakmatek loos iha fatin ne'e. E momento ne'e nia declara direta ba Primeiro-Ministro e nia *black list* duni, mas agora reativa. Ha'u husu compromisso VIII Governo nian, dehan halo avaliação ka verificação *ulang* ne'e tem que la'o duni, bá husu duni comunidade Viqueque, Ossu e autoridade sira-ne'e para bele hatene loloos problema nia fukun ne'e iha ne'ebé.

Obrigado.

Sr.<sup>a</sup> **Presidente** (Maria Terezinha da Silva Viegas): — Obrigada, distinto Deputado.

A seguir e último, distinto Deputado Joaquim dos Santos.

Faz favor.

Sr. **Joaquim dos Santos «Boraluli»** (FRETILIN): — Obrigado ba Presidente laran di'ak.

Ha'u invoca Regimento artigo 57.º atu halo observação ida ba Deputado Mandati nia declaração ida foin daudauk ne'e, se bele, Governo responde iha tempo badak.

Kona-ba ratifica convenção ne'ebé trata ema lakon, tinan kotuk Comissão A mós iha hanoin hanesan, mas la consegue resolve iha Parlamento tanba hein Governo ninia disponibilidade. Mas, ha'u hanoin, IX Governo bele responde iha tempo badak, tanba ita-nia Nação iha dignidade quando ita trata ho valores da resistência, liuliu ba autor ba libertação sira ninia memória. Ida-ne'e importante. Ha'u hanoin, Sr. Vice-Ministro, favor ida husu ba Governo atubele acelera lailais proposta ne'e. Deputado mak halo karik, aban ha'u hatama, mas buat ne'e competência Governo nian, é melhor Governo apresenta proposta de ratificação.

Segundo, ha'u secunda Deputado Dário nian kona-ba estrada Ossu. Ba Deputado CNRT ida ohin declara ne'e, companhia ida buka kaer ne'e *black list* e Governo bá tau nia halo saida? Uluk tau nia iha-ne'ebá ne'e atu halo manutenção de'it, estrada husi Venilale ba Viqueque ne'e companhia China mak kaer, ne'ebe husik companhia ne'e mak kaer, nia halo manutenção ne'e ba tempo seluk. Governo tem que haree ida-ne'e.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Molok atu fó ba declarante declaração política nian, antes de tudo ha'u fó ba Comissão F ho D, karik iha resposta ruma ba apreciação ne'ebé hato'ó husi distintos Deputados. ba Comissão F, três minutos.

Faz favor.

Sr.<sup>a</sup> **Maria Gorumali Barreto** (CNRT): — Obrigada ba oportunidade.

Ha'u-nia respeito ba Sr.<sup>a</sup> Presidente em exercício no mós Vice ho *Sekretaris* e colega distinta e distinto Deputado sira hotu.

Ha'u-nia respeito mós ba Sr. Vice-Ministro dos Assuntos Parlamentares, ba audiência tomak, no mós povo doben ne'ebé sintoniza hela Rádio Parlamento Nacional.

Ba questão sira-ne'ebé ohin foti, primeiro, ha'u hakarak hato'ó ami-nia obrigado ba Deputado sira-ne'ebé fó apreciação ba fiscalização Comissão F ninian, ne'ebé ami hakerek completamente iha relatório fiscalização ida-ne'e, espera katak Deputado sira bele acesso ba, lê hotu ami-nia relatório ne'ebé halo iha-ne'e.

Kona-ba questão ne'ebé ohin colega Deputado sira foti, liuliu ba oxigénio ne'ebé precisa aloca ba posto saúde sira hotu, ami, Comissão F, la iha objeção. Tanba baseia ba fiscalização Comissão F nian katak moras ne'ebé povo doben Timor-Leste hasoru, número um ne'e mak *ISPA (Infeksi Saluran Pernapasan Akut)*, respiratório, então, *oksigen* ne'e ita precisa duni atu aloca ka distribui ba to'ó iha posto saúde. Tanba posto saúde la iha *oksigen*, paciente sira-ne'ebé mai ho moras respiratório tem que refere ba to'ó iha centro saúde. Ita hotu hatene katak ita-nia geografia, distanciamento ne'ebé iha, ho condição infraestrutura ne'ebé iha, katak husi posto saúde ba centro saúde ida mós ho distancia ne'ebé dook, quando ema ho moras respiratório ka ho *ISPA*, bainhira to'ó iha-ne'ebá bele grave liután, ne'ebe, ida-ne'e ami la iha objeção e ami aceita.

Tuirfalimai, kona-ba condição ai-moruk ne'ebé ohin colega Deputado sira hato'ó, katak ai-moruk balu la iha qualidade, ita iha *stock out* ai-moruk no mós paciente balu ne'ebé ita-nia médico sira fó receita bá atu sosa fali iha clínica sira iha li'ur, ha'u hakarak convida colega distinto Deputado sira atu loke Relatório da Direção Nacional de Farmácias e Medicamentos, página n.º 7, hahú kedas husi n.º 6 to'ó n.º 10, ho página n.º 8, ne'ebé ohin distinta Deputada Lígia mós kala consegue lê, nia mós cita ida-ne'e.

Se ita lê iha página n.º 7 ho 8, iha-ne'ebá ita hatene ona tanba sá maka acontece situação sira-ne'e, e convida mós colega Deputado sira, labele haluha lê mós Relatório Fiscalização Comissão F ninian iha SAMES, Laboratório Nacional, Hospital Nacional Guido Valadares, ne'e relevante tebes ba problema ne'ebé ita foti. Tanba ne'e, ha'u hanoin, atu fó-hanoin de'it ba colega sira atu lê filafali, tanba

ohin Relator la lê substância relatório sira hotu, liga liu ba conclusão ho recomendação, ami convida para bele lê fali.

Tuirfalimai, kona-ba orçamento ne'ebé aloca ba SAMES, iha Orçamento Retificativo ne'e aumenta 6 milhões ho orçamento ne'ebé original iha Orçamento Geral Estado 2023, ne'ebe, Orçamento Retificativo ne'e aumenta 6 milhões, e, se la sala, iha SAMES ne'e Orçamento Retificativo 15 milhões iha-ne'ebá, orçamento ida-ne'e atu halo completo.

Se Ita-Boot sira lê iha informação ne'ebé ami hetan, tuir estandardização internacional ninian, tuir loloos alocação ai-moruk ba cada ema ida ne'e 10 USD. Ne'e ami relata iha relatório ida-ne'e, ne'ebe, aumenta tan 6 milhões ba SAMES, ita espera katak bele hamenos *stock out* ai-moruk iha Timor-Leste. Maibé, hanesan ohin colega sira ninia recomendação, katak precisa haree didi'ak SAMES, ami mós la iha objeção ba ne'ebá, ami aceita tebes atu haree, karik Ministério Saúde bele halo processo investigação ida ba SAMES.

Liga ba idosos ninian, Sr. Deputado Gabriel, ami la iha objeção mós, tanba dados ida-ne'e mak iha fiscalização ami hetan e ami relata beibeik iha relatório fiscalização Comissão F nian mai kedas husi V Legislatura, e até hein fali ami-nia relatório fiscalização tuirmai sempre acontece e ferik ho katuas no ema ho deficiência sira-ne'ebé hetan subsídio husi Governo, sira sei moris hela maibé sira-nia naran lakon husi sistema, ida-ne'e maka problema ne'ebé ami mós la iha objeção e ami aceita tebetebes, ami sei tau atenção ba situação ida-ne'e.

Ikusliu, Sr. Vice-Ministro, ha'u hanoin, Direção Nacional Farmácia e Medicamentos precisa...

*Presidente taka microfone Deputada ne'e nian.*

Sr.<sup>a</sup> **Presidente** (Maria Terezinha da Silva Viegas): — Já ultrapassou três minutos. Deputada, relatório hotu-hotu simu ona, karik atu fó de'it apreciação ba comentário sira-ne'ebé ohin hato'o.

Ha'u fó filafali ba Comissão D.

Faz favor.

Sr. **Ricardo Baptista** (CNRT): — Obrigado, Sr.<sup>a</sup> Presidente em exercício.

Hakarak agradece ba colega sira-ne'ebé halo ona apreciação ba ami-nia relatório, ida-ne'e maka situação real iha terreno, e, ita hotu-hotu hein katak ho relatório ne'ebé ita halo bele lori, hanesan iha ami-nia recomendação, urgência ida ba Governo atu resolve ida-ne'e. Ho perfuração *onshore* ne'ebé la'o, bele substitui mós ita-nia Fundo mina-rai ne'ebé agora menus ba daudaun ona, ho ida-ne'e maka ami agradece ba colega sira hotu e hanoin katak ita hotu iha-ne'e iha hanoin ida de'it, e husu ba Governo para bele resolve problema husi parte rua ne'e ho lailais.

Ho biban ida-ne'e mós, Sr.<sup>a</sup> Presidente, ha'u hakarak liga ba caso ida foin daudauk, ne'ebé acontece ba labarik menoridade ida. Polícia sira halo tiha ona «capturação» e investigação hotu tiha ona, maibé, tanba ne'e hanesan caso ida-ne'ebé planeado liuhusi ema ida, sira hanesan iha plano para halo agressão física hasoru labarik ida-ne'e, iha momento ida-ne'e ha'u hakarak husu ba parte polícia e parte justiça atu haree ida-ne'e. Tanba caso ida-ne'e la'ós caso baibain, caso sério, tanba ita-nia labarik sira barak mak la'o hela iha estrada e ita mós, karik ita iha sira-nia fatin, inan-aman ida nia fatin, ita sente buat ne'e hanesan sai problema ida que dala ruma ita mós la simu.

Ha'u aumenta de'it ida-ne'e.

Obrigado barak.

Sr.<sup>a</sup> **Presidente** (Maria Terezinha da Silva Viegas): — Muito obrigada, Sr. Deputado.

Governo bele regista. Molok ha'u atu fó ba declarante husi Bancada KHUNTO, iha ponto de ordem ida, oxalá ikus ona, husi Distinto Deputado Domingos Augusto Deker.

Faz favor.

Sr. **Domingos Augusto «Deker»** (CNRT): — Obrigado ba oportunidade.

Ha'u secunda de'it ponto tolu.

Primeiro, kona-ba preocupação Deputado sira-nian kona-ba saúde.

Tuir ha'u-nia hanoin, precisa cria clínica móvel ida. Ba ponto ida-ne'e, ha'u sugere ba Ministério Saúde ho Ministério para os Assuntos dos Combatentes da Libertação Nacional (MACLN) atu haree programa ida-ne'e, tanba preocupação ida-ne'e pertinente tebes. Ita-nia combatente barak, comunidade barak, moras ne'e iha uma de'it, la hetan tratamento, facilidade la iha.

Segundo, kona-ba segurança.

Ha'u sugere ba Governo, cria equipa conjunta ida atu buka ke'e problema ninia hun, natureza ka ema nia plano, tanba, ha'u haree, ne'e sério tebes.

Terceiro, problema lixo, ne'e preocupante tebetebes, cidade Díli ita haree fo'er aat liu. Fatin hanesan João Paulo II, uluk moos tebes, agora ema lori fali labarik sira-nia kaan sira tau iha *kalén*, tau iha plástico laran rebo-rebo loos, que ita haree imagem ne'e aat liu.

Ne'ebe, ha'u hanoin, atu secunda de'it preocupação sira-ne'e.

Ba oportunidade, obrigado.

Sr.<sup>a</sup> **Presidente** (Maria Terezinha da Silva Viegas): — Muito obrigada, distinto Deputado.

Ohin devia distinto Deputado inscreve de'it, di'ak liu, atubele fó apreciação ou halo intervenção normal. Maibé liu ona, ba próximo ita hanoin, ita aprende hamutuk, distinto Deputado.



Molok atu fó ba Vice-Ministro, ha'u fó ba distinto Deputado husi Bancada KHUNTO atu fó nia última palavra. Cinco minutos ou três minutos.

**Sr. António Verdial de Sousa (KHUNTO):** — Muito obrigado, Sr.<sup>a</sup> Presidente em exercício.

Dala ikus, fó filafali tempo mai ha'u atu ko'alia. Liga ba assunto declaração política ne'ebé ohin Partido Kmanek Haburas Unidade Nacional Timoroan foca ba merenda escolar, iha-ne'e ha'u atu hatete katak ha'u agradece tebetebes ba distinta no distinto Deputado hotu-hotu ne'ebé aprecia ho declaração política ida-ne'e.

Sr. Vice-Ministro ne'ebé trata assunto parlamentar mak ne'e, ha'u la'ós foti de'it husi informação, maibé iha semana tolu ba kotuk ha'u-ata rasik hakat ba rai Sarin – Sarin iha Ita-Boot nia rain rasik – iha-ne'ebá professor no professora sira hatete katak «Agradece tebes Deputado Verdial bele marca presença iha-ne'e». Tanba saida? Hahú husi I Legislatura to'o ba Legislatura ida-ne'e, seidauk iha Deputado ida maka marca presença iha-ne'ebá, inclui Sr. Vice-Ministro karik, ne'ebe, ha'u atu hatete katak ha'u aprecia tebetebes ba distintos Deputados ne'ebé fó apreciação mai declaração política ida-ne'e. Buat ne'ebé loloos ne'e mak ohin distinto Deputado Presidente Comissão G ko'alia ne'e. Liga ba declaração política ida-ne'e ha'u atu hatete ho ha'u-nia fuan ida-ne'e, ohin ha'u cita liafuan mambae, katak «*poor of quality control*», menus iha controlo de qualidade Governo ninian. Ho nune'e, hanesan declarante ba declaração política ida-ne'e, ho laran haraik an, husu ba Governo, hadi'a sistema no mecanismo! Favor ida, halakon tiha ninia burocracia ida ne'ebé naruk tebetebes, especial liu halakon tiha companhia fornecedor! Karik bele, orçamento ida-ne'e agrupa iha fatin ida, atu tau iha Ministério Administração Estatal ka atu tau iha Ministério Educação, ne'e Governo nia competência exclusiva. Maibé, dala ida tan, hanesan Deputado, ha'u husu atu burocracia ne'e halakon tiha, di'ak liu ne'e fó direta osan ne'e ba responsável escolar sira, atu nune'e sira gere direta e depois Governo controla no Parlamento Nacional fiscaliza. Ida-ne'e mak di'ak.

Liga mós ba distinto Deputado husi Bancada FRETILIN nian ne'ebé ohin cita kona-ba escola ida iha rai Betano, ne'e escola técnico vocacional, dala barak, dala wa'in, iha Legislatura tinan kotuk nian ha'u ko'alia beibeik iha fatin ida-ne'e, depois, Comissão G ne'ebé ha'u lidera, bá iha-ne'ebá, mai iha-ne'e ha'u husu kedan, «karik bele, Ministério da Educação tama iha coordenação ho Ministério da Agricultura atu nune'e sira bele orçamenta hodi hadi'a condições iha-ne'ebá», maibé, se di'ak liu ne'e buat ne'e fó ba educação. Maibé, na realidade Governo hotu nia mandato la realiza, ne'ebe, hanesan Deputado, ha'u nafatin husu atu Governo tem que tau atenção séria ba assunto ida-ne'e, tanba agora daudaun iha IX Governo Constitucional ita cria ona secretaria de Estado ne'ebé específico trata escola técnico vocacional sira iha território nacional tomak.

Liafuan seluk la iha, agradecimento wa'in tebetebes ba distinta no distinto Deputado ne'ebé rona ha'u-nia declaração política ohin lora.

Muito obrigado, Sr.<sup>a</sup> Presidente em exercício.

Sr.<sup>a</sup> **Presidente** (Maria Terezinha da Silva Viegas): — Muito obrigada, Sr. Deputado.

Ikusliu, ha'u fó tempo ba Sr. Vice-Ministro atu responde questão sira-ne'ebé Deputado sira foti.

Sr. **Vice-Ministro dos Assuntos Parlamentares** (Adérito Hugo da Costa): — Obrigado ba Sr.<sup>a</sup> Presidente em exercício, membro da Mesa, distinto e distinta Deputado sira hotu.

Hanesan baibain, ami regista assunto sira-ne'ebé Sr. Deputado sira foti, maibé ha'u adianta assunto balu ne'ebé ha'u iha referênci'a atubele clarifica provisoriamente, quando aguarda resposta mais detalhada husi «linha ministerial» sira relevante.

Ha'u hahú ho Relatório Fiscalização Comissão D e Comissão F nian.

Sobre Comissão D, kona-ba ita bolu *gap* ka disputa entra companhia *Timor Resource* ho *Timor Gap*, ne'ebé existe ona quase três anos, IX Governo, liuliu relativa ho assunto ida-ne'e, ministério relevante aguarda hela lei orgânica Ministério do Petróleo e Minerais ninian, iha tempo badak promulga, sei hamutuk ho ANPM ho mós *Timor Gap* atu halo avaliação e continuação oinsá buka solução entre companhia estatal *Timor Gap* ho *Timor Resource* ba disputa ne'ebé sira iha, liuliu substância ba interpretação cláusula contrato ba perfuração ninian bloco hira iha costa sul, hamutuk ho companhia *Timor Resource*.

IX Governo, iha semana rua ikus, intensivu loos atu completa tiha lei orgânica sira iha «linha ministerial» nian, nune'e Ministério sira-ne'ebé iha ligação ho entidade sira ita temi bele serbisu hamutuk ho entidade sira-ne'e para buka nia solução imediata, liuliu ba iha *Timor Resoure* ninian. Público hotu inteira ona assunto ne'e e atu buka solução halo nu'usá, ida-ne'e Governo nia competência duni.

Ne'e ha'u aproveita atu mós fó kedas resposta ba Deputado sira-ne'ebé fó observação ba relatório Comissão D nian relativa ho assunto *Timor Resources* e *Timor Gap*. IX Governo sei fó andamento ba ida-ne'e, e regista ho sério oinsá fó solução imediata quando orgânica ministério ninian completa iha tempo badak.

Kona-ba SAMES, Comissão F ko'alia, recomendação ami regista. Maibé hakarak adianta de'it katak horas ne'e duni iha Mesa Presidência Conselho Ministros nian iha ona esboço ida atu haree kona-ba redefine fali estatuto SAMES nian, hanesan ohin iha relatório fiscalização no mós recomendação, inclui Sr.<sup>a</sup> Deputada Cedelízia ninia observação, katak precisa redefine fali, fó competência ba SAMES ou lae, quando iha prática ita haree hela obstáculo barabarak liga ho menos ai-moruk, fornecedor, companhia ne'ebé manán mai ho qualidade seluk. Governo haree ona ida-ne'e, e esboço ba alteração estatuto SAMES nian iha mesa ona, iha tempo badak sei halo ajuste ka alteração

ba estatuto SAMES ninian. Mais detalhe, Ministério sei fó resposta detalhada escrita iha tempo badak ba assunto ida-ne'e, e ami lori relatório ida-ne'e sei envia ba Ministério na'in-rua relevante.

Kona-ba merenda escolar ninian, declaração política Bancada KHUNTO ninian, ami hakarak adianta katak loos, questão ida merenda escolar ne'e Governo anterior delega ona ba MAE (Ministério da Administração Estatal) mak gestor e implementador iha kraik.

IX Governo haree assunto ida-ne'e atu buka ninia solução, efetivo liu mak ida delega ba MAE ne'e ninia implementação ka iha dalan seluk tan, maibé, antes entrega ba MAE ne'ebé orçamento ne'e transfere direta ba administração município sira, IX Governo mós regista ho didi'ak implementação gestão ida foun iha VIII Governo nian halo quando orçamento ba merenda escolar ninian transfere ba conta bancária município sira-nian hodi implementa.

Ami mós regista hela informação ne'ebé Sr. Deputado sira ohin foti sobre autoridade iha município sira halo gestão ba orçamento merenda escolar nian no balu usa lori halo fali aquisição carreta ou saída, informação ne'ebé ohin Sr. Deputado sira foti ami mós regista ida-ne'e e Governo sei haree ho didi'ak, oinsá efetividade, disciplina implementação merenda escolar ne'e nian, quando Governo central hasa'e ona montante ida 32 centavos ba 42 centavos.

Iha implementação, montante ida sa'e ne'e tuir loloos di'ak liután, mas ninia qualidade oin-seluk fali, contrário, então IX Governo aproveita oportunidade ida-ne'e atu haree oinsá gestão foun atu implementa ba merenda escolar ne'ebé mais qualidade no mós efetiva no la iha burocracia, hanesan ohin Sr. Deputado sira foti.

Ha'u lalika hatete kona-ba tansá mak muda husi Ministério Educação ba MAE tanba assunto ida-ne'e Sr. Deputado sira acompanha rasik, implementação iha regime ida uluk ita dehan katak ne'e burocracia demais, ho envolvimento professor sira bá halo fali relatório implementação merenda escolar, tanba ne'e mak Governo sira anterior muda ba MAE para depois la bele husik professor sira mak haree fali gestão implementação, gestor ba projeto merenda escolar nian.

Ami regista mós transferência médico sira husi centro saúde sira barak liu ba Hospital Nacional Guido Valadares, ami sei adianta ida-ne'e ba Sr.<sup>a</sup> Ministra ho ninia Vice na'in-rua atu fó resposta ba situação ida-ne'e.

Sobre Díli nakonu ho número cidadão sira, pessoal sira ho moras mental, Sr. Deputado sira acompanha karik iha IX Governo ninia programa, durante ne'e ita depende ba centro tratamento ema ho moras mental ne'e ida de'it, mak iha Laclubar, ne'e mós *pribadi* nian, então iha IX Governo nia programa atu harii ka aumenta tan centro ba reabilitação ka tratamento, cuidado ba pessoal sira ho moras mental iha nível município, e Programa IX Governo hatete ne'e ho claro tebetebes.

Kona-ba escola vocacional tolu ne'ebé durante ne'e halo gestão no operacionalização orçamento e plano hotu iha Ministério da Agricultura e Pescas ninian, assunto ida-ne'e mós Sr. Deputado sira ba haree iha programa IX Governo ninian, escola tolu ne'e entrega filafali ba Ministério

Educação hodi halo gestão, quando tinan barak nia laran iha Ministério Agricultura. Posição Governo nian discussão ho kle'an tansá mak tem que entrega fali escola tolu ne'e ba Ministério Educação nian, para halo gestão iha setor educação nian mais orientado. Ne'e decisão IX Governo nian, e transforma ona iha prática iha IX Governo nia orgânica, depois mós sei tama iha concreto iha plano de ação orçamento 2024 ninian. Portanto, escola tolu ne'e decisão clara ona, katak fila ba Ministério da Educação mak halo gestão ba operacionalização, la'ós ona iha Ministério da Agricultura.

Assunto ida seluk liga ho CLN (Centro de Logística Nacional) ninia dívida ba carreta sira-ne'ebé aluga iha Baucau nian, Sr.<sup>a</sup> Deputada Veneranda Lemos ninian, ami regista assunto ida-ne'e. Maibé ha'u lembra iha-ne'e, ha'u loke ha'u-nia nota, karik assunto ida-ne'e levanta iha legislatura anterior, la'ós iha legislatura foun karik. Mais ou menos iha ha'u-nia participação iha-ne'e, assunto ida aluga carreta 30 hodi facilita transporte Cesta Básica nian iha-ne'ebá, ha'u foin regista ohin, mas depois ha'u sei adianta ba entidade relevante atu haree assunto ida-ne'e.

Sr. Deputado Mandati ninian sobre pessoas desaparecidas, assunto ida ita hotu nian, ha'u sei halo andamento ba ministério relevante sira atu haree oinsá medida sira ita atu halo em nome Estado Timor-Leste, depois em relação ho nação ne'ebé ita precisa halo *lobby*, halo aproximação, continua, hamutuk mós ho entidade sira-ne'ebé halo ona contactos ho carácter atu hanesan durante ne'e, por exemplo PDHJ, ne'ebé mós através sira-nia serviço ho PDHJ Indonésia nian consegue deteta família sira ou oan-kiak sira-ne'ebé lakon e começa halo ona reconciliação.

Ha'u hanoin, dalan ida-ne'e iha ona, e medidas tuirmai sei sa'e tan to'o nível ida-ne'e. Portanto, la'ós de'it Governo, maibé entidade sira iha competência própria haree ona assunto ida-ne'e, ita haree to'ok nia progresso ba oin. Ita considera, regista, katak testemunha sira ita precisa aproveita, mais cedo possível, quando sira sei moris para sai testemunha.

Ita mós regista hela serviço Chega! ninian, ne'ebé liga kedas ho Sr. Deputado Natalino nia assunto, plano Chega! nian atu harii tan museu ida iha espaço próprio Comarca Balide nian, ne'ebé ami mós simu ona protesto husi entidade lubuk ida, inclui Comité 12 de Novembro ninian, ne'ebé sira-nia escritório durante ne'e mós iha corredor Comarca Balide ninian, fó mós sira-nia aspiração atu hanoin katak processo construção ba edifício foun iha espaço corredor Comarca nian atu hanoin fali oinsá, bele continua ou lae, ou bele continua fora husi espaço histórico ex-Comarca Balide ninian. Governo regista hela ida-ne'e, e sei adianta mós ba Conselho de Ministros tanba assunto Chega! ne'e nian tutela iha Ministério da Presidência do Conselho de Ministros.

Kona-ba atu halo ratificação convenção, ha'u hanoin, Sr. Deputado Joaquim no mós Sr. Mandati, ami sei regista ida-ne'e ba gabinete Reforma Justiça ninian ne'ebé estabelecido ona, atu haree oinsá processo ne'e atu halo adiantamento.

Ami regista mós preocupação Sr. Deputado sira-nian sobre companhia sira-ne'ebé envolve iha projeto estrada troço Venilale, Ossu ho Viqueque ninian, ne'ebé dala hira ona Sr. Deputado sira foti

em relação ho companhia ne'ebé kaer hela projeto ida-ne'e já mais de 10 anos. Governo sei haree assunto ida-ne'e, liuliu Ministério das Obras Públicas, atu haree questão ne'e.

Questão seluk ohin Sr.<sup>a</sup> Deputada Angelina foti, sobre estatuto funcionário sira iha ANAS, I.P. (Autoridade Nacional para a Água e o Saneamento) ho ANE, I.P. (Autoridade Nacional Eletricidade) e bolu dehan funcionário iha BTL, E.P. ninian no mós EDTL, E.P. ninian ne'ebé iha, hanesan ohin ha'u dehan ona, ministério relevante sira iha assunto ida-ne'e nia lei orgânica em progresso atu tama iha aprovação, mak sira sei depois haree assunto ida-ne'e.

Maibé liga ho estatuto funcionário contratado, funcionário permanente sira, IX Governo, desde nia orgânica entrada em vigor, quando ami tama iha progresso aprovação orgânica próprio ministério nian, serbisu namanas hela ho Comissão da Função Pública para realoca ou redefine estatuto funcionário sira-ne'ebé iha entidades ne'ebé extintas.

Portanto, la'ós Governo mesak, maibé hamutuk ho Comissão da Função Pública, serbisu namanas hela hodi trata assunto sira liga ho Ministério ne'ebé taka, hamutuk mós ho entidade sira ohin ha'u temi, em coordenação ho Comissão da Função Pública.

Atu hateten de'it katak Comissão da Função Pública só atende de'it, sira iha memória institucional, liga ho funcionário sira permanente, maibé funcionário sira contratado fora husi Comissão da Função Pública nia gestão, controlo ou regulamentação ba estatuto sira-nian delega tomak ba ministério relevante sira atu oinsá haree funcionário sira ho estatuto contratado ka, sira bolu, casuais. Pelo contrário, ho funcionário sira-ne'ebé permanente, Comissão da Função Pública toma responsabilidade imediata em coordenação ho ministério sira-ne'ebé extinto ona, nune'e ho Governo atu buka oinsá realoca ou recoloca funcionário sira-ne'e ba fatin ne'ebé sira continua sira-nia carreira profissional hanesan funcionário público.

Ha'u sente, assunto sira-ne'e mak ha'u bele fó resposta, assunto sira seluk ne'ebé Sr. Deputado sira levanta, ha'u sei encaminha ba ministério relevante sira.

Sr.<sup>a</sup> Presidente, mak ne'e de'it.

Sr.<sup>a</sup> **Presidente** (Maria Terezinha da Silva Viegas): — Muito obrigada, Sr. Vice-Ministro.

Molok ita atu bá intervalo, ha'u atu fó-hanoin hikas fali ba presidentes das comissões, membro da comissão sira, katak tuir informações ou questões ne'ebé foti, iha ita-nia oin, ita-nia matan, iha questões barak mak urgente, Deputado sira atu hala'o sira-nia knaar tun bá halo fiscalização.

Mós, ikus, ohin Deputado Ricardo foti, assunto ne'e liga ho segurança, husi Governo, favor ida, tau hela atenção ba atuação ne'ebé acontece ba labarik ida-ne'ebé foi capturado.

Nune'e mós ba assuntos idosos nian, naran ona idosos, maibé subsídio ne'e atrasa nafatin, ida-ne'e consideração saida mak ita atu fó ba sira? Ne'ebe, Comissão F, favor tau hela atenção.

Nune'e mós Comissão G, liga ho merenda escolar ho escola ne'ebé ohin distinto Deputado foti, Comissão E, B e Comissão D, karik fiscaliza não é deslocação bá municípios, Díli merece ita-nia atenção de perto, ita-nia fiscalização de perto. Ne'ebe, ba Comissão sira, têm trabalho a fazer e muito trabalho.

Ho nune'e, molok ita tama ba Ordem do Dia, ita *break* ba intervalo. Loloos 12h4 ita filafali, maibé 12h20 ita filafali atu tama ba agenda Ordem do Dia, molok ita termina ita-nia sessão ba loron ohin nian.

Muito obrigado, distintos Deputados.

Ita bá intervalo, *snack*.

*Horas hatudu tuku 11 liu minuto 58.*

Sr.<sup>a</sup> **Presidente** (Maria Terezinha da Silva Viegas): — Husu ba Vice-Chefe Bancada CNRT nian atu, favor ida, completa cadeira mamuk sira-ne'e, atu nune'e ita bele fó continuidade ba ita-nia sessão Ordem do Dia.

*Horas hatudu tuku 12 liu minuto 20.*

Será que a Bancada do CNRT está a fazer greve? Distinto Deputado, favor comunica ho Deputados Bancada do CNRT atu preenche cadeira mamuk sira-ne'e, ho nune'e ita bele completa ita-nia agenda Ordem do Dia.

Já temos aqui quórum, 34 Deputados, ho nune'e ha'u fó ba Sr.<sup>a</sup> Secretária da Mesa atu halo leitura ba proposta ne'ebé hatama.

Sr.<sup>a</sup> **II Vice-Secretária da Mesa** (Maria Teresa da Silva Gusmão): — Obrigada, Sr.<sup>a</sup> Presidente em exercício, boa tarde ba Ita-Boot no Vice, ba colegas Deputadas no Deputados, maluk rona-na'in sira.

«Bancada parlamentar do CNRT e da FRETILIN

N.º 92/BCD/CNRT/VIII/2023.

Excelentíssima, Sr.<sup>a</sup> Presidente Parlamento Nacional,

Ilustre Deputada Maria Fernanda Lay.

Díli, Timor-Leste.

Assunto: Apresentação candidatura membro Conselho Superior Defesa no Segurança.

Excelência,

Haktuir assunto carta ne'e, Bancada CNRT no FRETILIN hakarak apresenta naran candidatura ba membro Conselho Superior Defesa no Segurança ba Sr.ª Presidente Parlamento Nacional tuir lei haruka.

Naran candidatura ba membro Conselho mak hanesan tuirmai ne'e:

1. Deputado Duarte Nunes.
2. Deputada Maria Terezinha da Silva Viegas.
3. Deputado David Dias Ximenes «Mandati».

Mak ne'e de'it, ba atenção no colaboração di'ak, la haluha hato'o obrigado wa'in.

Díli, 4 de agosto de 2023.

Aniceto Longuinhos Guterres Lopes,

Presidente da Bancada da FRETILIN

Lúcia Taeki,

Vice-Presidente da Bancada do CNRT».

Tuirmai, ami sei lê declaração de aceitação husi candidato membro Conselho Superior Defesa no Segurança.

«Declaração de aceitação

Ha'u, Duarte Nunes, declara aceita ho nomeação husi Parlamento Nacional, hodi sai membro do Conselho Superior de Defesa e Segurança, comprometido atu halo knaar tuir Constituição RDTL ba assunto Defesa no Segurança nian.

Obrigado wa'in.

Díli, 7 de agosto de 2023.

Declarante,

Duarte Nunes, Deputado».

«Declaração de aceitação

Ha'u, Maria Terezinha da Silva Viegas, declara aceita ho nomeação husi Parlamento Nacional, hodi sai membro do Conselho Superior de Defesa e Segurança, comprometido atu halo knaar tuir Constituição RDTL ba assunto Defesa no Segurança nian.

Obrigado wa'in.

Díli, 4 de agosto de 2023.

Declarante,  
Maria Terezinha da Silva Viegas, Deputada».

«Declaração de aceitação

Eu, David «Mandati» Dias Ximenes, nascido em Bagueia a 1 de março de 1953, estado civil casado, portador de cartão eleitoral 00564237, residência atual Bairro Pité, da Aldeia de Niken do Suco de Bairro Pité, do Posto Administrativo de Dom Aleixo, do Município de Díli, venho, respeitosamente, informar a V. Ex.<sup>a</sup> que estou disponível para ser um dos candidatos para membro do Conselho Superior de Defesa e Segurança.

Esta declaração foi feita por mim para o efeito de candidato proposto pelo Partido FRETILIN.  
Díli, 1 de agosto de 2023.

David «Mandati» Dias Ximenes,  
Membro do Parlamento Nacional».

Obrigada, Sr.<sup>a</sup> Presidente.

Sr.<sup>a</sup> **Presidente** (Maria Terezinha da Silva Viegas): — Muito obrigada, Sr.<sup>a</sup> Secretária.

Ho nune'e, molok atu procede ba eleição, iha-ne'e boletim de voto hanesan nafatin altura ita halo eleição ba membro Conselho de Estado ninian, um só pacote, três nomes e um só quadrado para votação.

*Sr.<sup>a</sup> Presidente hi'it sa'e boletim voto hodi hatudu.*

Voto a favor ou nulo, ou contra. Nulo deixa nulo, a favor risca iha quadrado ida-ne'e...

*Sr.<sup>a</sup> Presidente hi'it sa'e boletim voto dala ida tan hodi hatudu.*

... Hanesan ita hotu hatene, loloos Conselho Superior de Defesa e Segurança ita elege hamutuk ho Conselho de Estado, maibé altura ne'ebá falta atu completa CV husi candidato na'in-tolu, ho nune'e mak ita procede ohin, no mós Presidente da República hein ona atu fó posse ba membros ne'ebé atu completa ba iha Conselho de Estado no mós Conselho Superior de Defesa e Segurança.

Ho nune'e, ha'u entrega ba Sr.<sup>a</sup> Secretária atu halo leitura ba ita procede bà votação.

Técnico sira, favor haree urna!



*Técnico husi DIPLEN hi'it urna mamuk hodi hatudu ba Deputado sira.*

Sr.<sup>a</sup> **II Vice-Secretária da Mesa** (Maria Teresa da Silva Gusmão): — Obrigada, Sr.<sup>a</sup> Presidente em exercício.

«Lista de presenças, sessão da eleição de três representantes para o Conselho Superior de Defesa e Segurança.

28 de agosto de 2023.

Sr.<sup>a</sup> Deputada Maria Fernanda Lay (CNRT);

Sr.<sup>a</sup> Deputada Maria Terezinha da Silva Viegas (CNRT);

Sr. Deputado Alexandrino Afonso Nunes (PD);

Sr.<sup>a</sup> Deputada Virgínia Ana Belo (CNRT);

Sr.<sup>a</sup> Deputada Maria Teresa da Silva Gusmão (PD);

Sr.<sup>a</sup> Deputada Bendita Moniz Magno (CNRT);

Sr. Deputado Domingos Augusto «Deker» (CNRT);

Sr.<sup>a</sup> Deputada Lúcia Taeki (CNRT);

Sr. Deputado Duarte Nunes (CNRT);

Sr. Deputado Marcos Soares Martins (CNRT);

Sr. Deputado José Virgílio R. Ferreira (CNRT);

Sr. Deputado Luís Ximenes Caldeira (CNRT);

Sr.<sup>a</sup> Deputada Maria Rosa da Câmara “Bisoi” (CNRT);

Sr. Deputado Leandro Lobato (CNRT);

Sr. Deputado Marcos Xavier (CNRT);

Sr. Deputado Óscar de Araújo (CNRT);

Sr. Deputado Firmínio Taequi (CNRT);

Sr.<sup>a</sup> Deputada Veneranda E. M. Lemos Martins (CNRT);

Sr. Deputado Natalino dos Santos Nascimento (CNRT);

Sr. Deputado Romeu Moisés (CNRT);

Sr. Deputado Gabriel Soares (CNRT);

Sr. Deputado Saul Salvador H. J. Amaral (CNRT);

Sr.<sup>a</sup> Deputada Maria Gorumali Barreto (CNRT);

Sr. Deputado Patrocínio Fernandes dos Reis (CNRT);

Sr. Deputado Virgílio Pereira (CNRT);

Sr.<sup>a</sup> Deputada Cedelízia Faria dos Santos (CNRT);

Sr. Deputado Francisco da Costa “Ikulay” (CNRT);

Sr. Deputado Albino da Silva (CNRT);

Sr.<sup>a</sup> Deputada Carminda Carlota (CNRT);  
Sr. Deputado Ricardo Batista (CNRT);  
Sr. Deputado Anacleto Freitas (CNRT);  
Sr.<sup>a</sup> Deputada Aliança da Conceição Araújo (CNRT);  
Sr. Deputado Mateus da Cruz de Carvalho (CNRT);  
Sr. Deputado Armando dos Santos Lopes (PD);  
Sr. Deputado António da Conceição “Kalohan” (PD);  
Sr. Deputado Manuel Henrique Noronha (PD);  
Sr.<sup>a</sup> Deputada Sancha Margarida Tilman (PD);  
Sr. Deputado Antoninho Doutel Sarmiento (FRETILIN);  
Sr.<sup>a</sup> Deputada Sância Florência Paixão Bano (FRETILIN);  
Sr.<sup>a</sup> Deputada Maria Angélica Rangel da Cruz dos Reis (FRETILIN);  
Sr. Deputado Dário Madeira (FRETILIN);  
Sr. Deputado Aniceto Longuinhos Guterres Lopes (FRETILIN);  
Sr.<sup>a</sup> Deputada Lúcia Norberta dos Santos Martins (FRETILIN);  
Sr. Deputado Antoninho Bianco (FRETILIN);  
Sr. Deputado David Dias Ximenes “Mandati” (FRETILIN);  
Sr.<sup>a</sup> Deputada Helena Martins Belo (FRETILIN);  
Sr. Deputado Joaquim dos Santos “Boraluli” (FRETILIN);  
Sr. Deputado António Moniz Calau (FRETILIN);  
Sr.<sup>a</sup> Deputada Maria Anabela Sávio (FRETILIN);  
Sr.<sup>a</sup> Deputada Nurima Ribeiro Alkatiri (FRETILIN);  
Sr. Deputado José da Cruz (FRETILIN);  
Sr.<sup>a</sup> Deputada Cristina Yuri Rebelo dos Santos Costa (FRETILIN);  
Sr. Deputado Abílio Quintão Pinto (FRETILIN);  
Sr. Deputado Florentino Ximenes da Costa “Sinarai” (FRETILIN);  
Sr.<sup>a</sup> Deputada Mariquita Soares (FRETILIN);  
Sr. Deputado Óscar Lima (FRETILIN);  
Sr.<sup>a</sup> Deputada Irene Gonzaga Sarmiento (KHUNTO);  
Sr. Deputado António Verdial de Sousa Gama (KHUNTO);  
Sr. Deputado António Verdial da Silva Ferreira (KHUNTO);  
Sr.<sup>a</sup> Deputada Olinda Guterres (KHUNTO);  
Sr. Deputado Luís Roberto da Silva (KHUNTO);  
Sr. Deputado Abel dos Santos (PLP);  
Sr. Deputado Helder Freitas “Kamarudin” (PLP);

Sr.<sup>a</sup> Deputada Maria Angelina Lopes Sarmiento (PLP);

Sr. Deputado Adolfo Martins (PLP)».

Obrigada, Sr.<sup>a</sup> Presidente.

Sr.<sup>a</sup> **Presidente** (Maria Terezinha da Silva Viegas): — Obrigada, Sr.<sup>a</sup> Secretária, no mós obrigada ba Distinto Deputado sira hotu.

Ita conclui ona ita-nia eleição ba membro na'in-tolu hodi completa membro Conselho Superior de Defesa e Segurança, no atu anuncia de'it katak quórum ba eleição ohin nian ho 56 Deputados presentes.

Ho nune'e, ha'u husu ba distinta Deputada Secretária e Vice-Secretária atu halo escrutínio ba contagem de votos.

Sr.<sup>a</sup> Bendita e Sr.<sup>a</sup> Teresa, se fazem favor.

*Técnico husi DIPLLEN, Quintiliano Ase no João Guterres, ho supervisão husi Deputada Bendita no Deputada Maria Teresa da Silva Gusmão, halo escrutínio.*

Obrigada ba Sr.<sup>a</sup> Secretária e Vice-Secretária, bele fila hikás bá fatin.

Muito obrigada bá na'in-rua.

Ho nune'e ha'u anuncia resultado da eleição ne'ebé ohin ita hala'o liu tiha ona, presentes não é 56, mas 55, 10 Deputados ausentes.

Resultado dos votos: a favor 53, votos em branco 2, nulo 0.

Total de boletim de votos no todo 55 Deputados.

Ho nune'e ita preenche ona ou ita completa ona órgãos de consulta do Presidente da República tuir artigo 148.º da Constituição.

Nune'e, ami sei envia resultado da eleição ne'e ba Presidente da República hodi hetan promulgação, e damos por terminada ou encerrada ita-nia sessão ba loron ohin nian.

Agradece ba distinto Deputado hotu-hotu nia paciência no presença, nune'e mós ba Vice-Ministro nia presença ne'ebé acompanha ita to'o rohan.

Votos de bom almoço ba hotu-hotu, e boa tarde.

Aban ita continua filafali ita-nia sessão às 09h00, se bem que ita bele pontual.

Muito obrigada.

*Horas hatudu tuku 1 liu minuto 1 loraik.*